

Inatsisissatut siunnersuummut nassuiaatit

Nalinginnaasumik oqaaseqaatit

1. Aallaqqaasiut

1.1 Siunnersuummut tunuliaqutaasut pingaarnertit

2007-imi suleqatigiissitaliaq nassuiaammik saqqummiussaqqarpoq, ”2007-imi Ilagiit aqunneqarnerat aaqqissugaanerallu pillugit suleqatigiissitap nassuiaataa”, tamatumani erseqqissaatigineqarluni, Ilageeqarnermi maleruagassat kiisalu maleruagassat nutaat nutaamik naliliiffigineqarnissaat pillugit iluarsartuussisoqarnissaa pisariaqartinneqartoq.

2010-mi pingaarnerusutut Kalaallit Nunaanni Ilagiinnut inatsit nutaaq, Ilageeqarneq pillugu Inatsisartut inatsisaat nr. 9, 19. maj 2010-meersoq (Ilageeqarneq pillugu inatsit), akuersissutigineqarpoq. Allannguutissatut siunnersuut Kalaallit Nunaanni Ilagiinnut maleruagassani pineqartumut iluarsartuussinermut tunngatinneqassaaq, taamatuttaaq kissaatigineqarluni Kalaallit Nunaanni Ilagiinnut maleruagassat pisariillisaavigineqarnissaannut kissaateqarnermut, ilaatigut maleruagassat ataatsimoortinneqalernissaat.

Siunnersuut pineqartoq aqqutigalugu Kalaallit Nunaanni Ilagiinni atorfinitsitsisarnermut maleruagassat nutarterneqassapput ataatsimoortinneqalissallutillu, taanna malillugu palasit ajoqillu upperisarsiornerup tungaatigut pissuteqartumik palasit ajoqilluunniit upperisarsiornermik pasinninnerminnut akerliusunik ilagiinni suliassanik suliaqarnissanut pisussaajunnaarsitaasinnaallutik, tassunga peqatigitillugulu atinik allannguisarnermut, uppernarsaatinik tunniusseqqittarnermut ilagiinni iliuuserisat kiisalu marluinnik oqaaseqarnermut, kalaallisut/tuluttut, aalajangersaasarnissaq akileeqqusisoqartarnissaalu pillugit aalajangersaanissamut pisinnaatitsisoqarnissaa.

Tamatuma saniatigut allannguatissat ikittunnguit pisariaqartinneqalernerat erserpoq, taakkualu immikkoortoq 2 ”Inatsisissatut siunnersuummi pingaarnertitat”-mi, sukumiinerusumik nassuiaaserneqassapput.

1.2 Inatsimmik piareersaanermi allaaserineqartut pingaarnertit

Ilageeqarneq pillugu inatsisip atuutilersinneqarneranut atatillugu ilageeqarnermut naalakkersuisoqarfik biskoppip allaffeqarfia suleqatigalugu ilageeqarnermi maleruagassat pisariaqartinneqartut kiisalu taakkua pingaarnerusumik tulleriiaarneqarnissaannut misissueqqissaarpoq. Tamatuma kingunerisaanik naalakkersuisoqarfik Ilageeqarnermi inatsisissap piareersarneqarnissaanut ataatsimiititaliamik pilersitsivoq, taamaalilluni ilageeqarnermi ilisimasat pitsaanerpaat soqutiginnittunut sapinngisamik iluaqutaasinnaaqqullugit.

Ataatsimiititaliaq Ilageeqarnermut Naalakkersuisoqarfimmiit marlunnik, Kalaallit Nunaanni Palasit Peqatigiiffianniit ataatsimik kiisalu inatsisilerituumik ilageeqarnermi inatsisilerinermi immikkut ilisimasalimmik Biskopip allaffianeersumik ataatsimik ilaasortaqaartinneqarpoq. Ataatsimiititaliap ilaasortalersorneqarneranut siunertarineqarpoq, ilageeqarnermi sulinermut, allaffissornikkut aamma inatsisilerinermut ilisimasalinnik ilaasortaqaartinneqarnissaata qularnaarneqarnissaa. Suliata nutaat suliassaanni ilaasortat inatsisissap piareersarneqarnissaanut ataatsimiititaliami ilaasortassatut toqqarneqassapput.

Inatsisissamut piareersarnermi ataatsimiititaliaq suliassinneqarpoq, Ilageeqarnermi sulisorisanut atorfinitsitsinermi maleruagassat atuuttut misissoqqissaarneqarnissaat, taakkualu allannguuteqaartinneqarnissaannut kaammattuutunik erseqqissunik saqqummiussaqaarnissaat. Ataatsimiititaliap pissusissamisoornerusutut paasivaa, allannguutissatut siunnersuutit Ilageeqarneq pillugu inatsimmut ilanngunneqarnissaat, taamaaliornikkut Ilageeqarnermi sapinngisamik ataatsimoortillugit inatsimmi ataatsimoortinneqalerniassammata.

Tamatuma saniatigut ataatsimiititaliaq akiliuteqaartitsisarnissamut kiisalu Ilageeqarneq pillugu inatsimmi aalajangersakkat atuuttut allannguutissaattut ataasiakkaanik kaammattuutunik erseqqissunik saqqummiussaqaarput. Ataatsimiititaliap kaammattuutai nalunaarusiami ataatsimi Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisumut juli 2012-imi tunniunneqarput.

Siunnersuut una aqutigalugu ataatsimiititalip inassuteqaatai Ilageeqarneq pillugu inatsimmut ilanngunniarneqarput.

2. Inatsisissatut siunnersuummi pingaarnertitat

Allannguutissatut siunnersuutip siunertaraa inatsisip siunniussaannngitsumik taassumalu sulinermi sumut atuutsinneqarnissaannut, Ilageeqarnermi suliassaqaarfimmi nutaamik kissaatigineqartut kiisalu nutarterinissaq siunertaralugu Ilageeqarneq pillugu inatsisip aamma Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-imeersup (atorfinitsitsisarneq pillugu peqqussut) Inatsisartut peqqussutaatigut nr. 11, 21. Maj 2002-imi allanngortinneqartoq, ataatsimoortillugit allanneqarnissaat nutarterneqarnissaallu pillugu.

2.1 Atorfinitsitsisarnerit

Atorfinitsitsisarnermut inatsisit atuuttut tassaapput Ilageeqarnermi atorfinitsitsisarneq pillugu Inatsisartut peqqussutaat nr. 8, 30. oktober 1998-imeersoq Inatsisartut peqqussutaatigut nr. 11, 21. Maj 2002 allanngortinneqartoq. Atorfinitsitsisarneq pillugu peqqussutit iluarsartuunneqarneranut atatillugu, Ilageeqarnermi atorfinitsitsinermut atatillugu iluarsartuussinermi pissusissamisoornerusutut paasineqarpoq, Ilageeqarnermi atorfinitsitsisarnermut tunngasut katersorneqarnissaat Ilageeqarnermilu inatsimmut atuuttumut ilanngunneqarnissaat. Taamaaliornikkut ilageeqarnermi inatsit atuisunut pisariinnerulissaaq.

Atorfinititsisarneq pillug peqqussummi kapitali 2-mi atuarneqarsinnaavoq, palasinik, provstinik domprovstinillu atorfinititsisarnerni ”oqaaseqaammik” ”inassuteqaateqarnermillu” atuisarnerit ataatsimoortillugit atorneqartarnissaat. Oqaatsit assigiit assigiissaarneqarnissaannut allannguutissatut siunnersuut iluarsartuunneqarpoq, taamaalilluni ilagiit sinniisaat palasinik, provstinik domprovstinillu atorfinititsisinnermut atatillugu ilagiit sinniisaat *oqaaseqaateqartalissallutik* biskoppilu *inassuteqaateqartalissalluni*. Siornatigut biskoppi ilagiit sinniisaannut ilisimatitsisarmissami paasissutissiisarnerni atuuffeqartaraluartoq, maanna biskoppi allannguuteqartinneqartumi tassani aalajangiisuusutut atuuffeqalissaaq, ilagiimmi sinniisaasa oqaaseqaatit saniatigut sapinngisamik qinnuteqaateqartut ikinnerpaamik pingasut pingarnerutillugit tulleriiaarneqartarnissaat inassuteqaatigisassallugit. Pisinnaatitaanermut agguaaasseriaaseq nutaaq pissaaq aqutseriaaseq nutaaq Ilageeqarneq pillugu inatsimmi pilersinneqartoq tunngavigalugu.

2.2 Akileeqquisarneq

Siunnersuummi kapitali 8 nutaaq ilanngunneqassaaq pisortat ataasiarlutik akilereersimasaannut kiisalu uppernarsaammik tunniusseqqinnermi innuttaasut aterminnik allannguuteqartitsineq pillugu namminneerlutik kissaateqarnerannut akileeqquisarnissaq atuutilersinneqassalluni, taamatuttaaq . Ilageeqarnermi akileeqquneqartarnissamik atuutilersitsineq tassaatinneqassaaq ilagiit suleriaasiinik nutaanngortitsinnermut innuttaasunillu sullissinnermmut atatillugu sullissinerunermi innuttaasut akiliutigisartagaasa annertusinissaannik nalinginnaasumik kissaateqarneq. Naammaginatutut isumaqarfigineqarpoq, atermik allanngortitsinnermi, sullissinerunerusumi, pisortat aningaasalersuineranni innuttaasut peqataasarnissaat, taamatuttaarlu naammaginatutut paasineqarpoq, uppernarsaammik innuttaasut kissaateqartarnerat akiliuteqartarnermik ilaqartinneqartarnera. Sukumiinerusumik nassuiaatit aalajangersakkanut ataasiakkaanut nassuiaatini kapitali 8-mut innersuussutigineqarput.

2.3 Upperisassiornermik paasinnineq pissutigalugu palasit ajoqillu upperisarsiornerup tungaatigut pissuteqartumik ilagiinni suliassanik suliagarnissanut pisussaajunnaarsitaasarnerat

Aalajangersagaq nutaajuvoq palasip ajoqillu ilagiinni iliuutsinut upperisarsiornermut paasinnittarnermut akerliusunik iliuuseqartannginnissamut peqataasannginnissamullu tunngalluni. Illersuineq siornatigut tamakkiisuunngitsumik ilagiit ileqqinut tunngaveqartinneqaraluarpoq, palasip/ajoqip inatsisinik paasinnittarnera sianiginarlugu tamanna § 14, imm. 3-mi erseqqissarneqarluarpoq. Aalajangersakkap atuutsinneqarsinnaaneranut assersuutaasinnaapput suaassuseqatigiit ilagiinni katitinneqartarnerat, inuit marluk katinneranni aappaa tamarmilluunniit avinneruppata il.il.

Palasi ajoqiluunniit pineqartoq ilagiinni iliuuseqarnissamut tunngatillugu isumaginnissinnaanani imaluunniit peqataasinnaanani misigippat, tamanna provstimut saqqummiunneqassaaq, taassumalu biskoppimut ingerlateqqissavaa, kingornalu taassuma

naliliiffigissavaa tamanna upperisarsiornermut tunnganersoq qinnuiginninnerlu akuerineqarsinnaanersoq naliliiffigissallugu. Suliami aalajangiivinnissaq biskoppip aalajangiiffigissavaa.

2.4 Ingerlateqqiinissamut periarfissat

Ullumikkut ingerlateqqiinissamut aalajangersakkat § 28-mi imaalillugit iluarsineqarput, biskoppip Naalakkersuisoqarfiullu akornanni tamakkiisumik ingerlateqqiisarnissaq tamakkiisuujunnaarsinneqarluni. Allannguut pilersinneqarpoq inatsisissap piareersarneqarnissaanut ataatsimiititaliap kaammattuina tunngavigalugu. Taamaalilluni inassuteqaatigineqarpoq, pingaartumik upperisarsiornermut tunngasut/imaqartut aalajangiiffigineqartarnerat Naalakkersuisoqarfimmiit tamakkiisumik misilinneqartanninnissaat, Naalakkersuisoqarfimmi ilageeqarnermi ilagiit aalajangiiffigisaasa naliliiffigineqarnissaannut tamatumunnga tunngasunik pigisaqartoqanngimmat. Naalakkersuisoqarfik siunissami, pingaartumik ilageeqarnermut suliassanik tunngassuteqartuni inatsiseqartitsineri tunngaviusutut killigitat kisiisa ilagiinni aalajangiinerni pineqartuni misilittassavaat.

2.5 Nakkutilliisarnissamut pisussaaffik

Suliassaqarfimmi pisinnaatitaaffik atuutsinneqartoq Ilageeqarnek pillugu inatsit § 20-mi atuarneqarsinnaavoq, tamatumani Oqaluffiit illutaat toqusullu inaat eqqarsaatigalugit nakkutilliisarnissamut pisussaaffik sumiiffimmi pineqartumi ilagiit sinniisaannit isumagineqartartussaavoq. Siunissami nakkutilliisarnissamut pisussaaffik oqaluffimmi atuagarsuarnik allattuisartup isumagisalisavaa. Allannguuteqartitsisoqarpoq ilagiit sinniisaat namminnek piunassutsiminnik suliaqartut illersorneqarnissaat qularnaarniarlugu, nakkutilliinissamummi pisussaaffik tamaviaarnartutut isumaqarfigineqarmat. Tamatuma saniatigut Ilageeqarnek pillugu inatsimmut tunngatillugu pissusissamisoortut nalilerneqarpoq, tamatumani atuarneqarsinnaalluni, palasi atuagarsuarnik allattuisartoq palaseqarfimmi atuuffimmini aqutsineri akisussaasuusarmat.

§ 20-mili erseqqissaatigineqarpoq, sumiiffimmi pineqartumi ilagiit sinniisaat suleqatigalugit nakkutilliisarneq ingerlanneqartassasoq.

2.6 Inatsisit atuuttut

Inatsimmut atuuttumut sanilliullugu inatsisissatut siunnersuut		
Inatsisit tunngaviusutut atuuttut	Oqaasertaliussatut atuutsinneqartut	Inatsisissatut siunnersuut
Ilageeqarnek pillugu Inatsisartut inatsisaat nr. 9, 19. maj 2010-meersoq	§ 4. Naalakkersuisut Biskoppimik isumaqatigiinniuteqarnikkut naalagiarititsisarnermi	§ 4. Naalakkersuisut Biskoppimik isumaqatigiinniuteqareernikkut naalagiarititsisarnermi ilagiinnilu iliuuserisat pillugit

	ilagiinnilu iliuserisat pillugit aalajangersakkanik aalajangersaassapput.	aalajangersakkanik aalajangersaasinnaapput.
Ilageeqarneq pillugu Inatsisartut inatsisaat nr. 9, 19. maj 2010-meersoq	§ 4, imm. 2. Naalagiarnermi ileqqorisassat ritualit, tussiutit aamma tussiutit tapiisa akuerineqarlutik atortussanngortinneqarnissaat pillugit Naalakkersuisut Biskoppip innersuussutaa naapertorlugu aalajangersaassapput.	§ 4, imm. 2. Naalagiarnermi ileqqorisassat ritualit, tussiutit aamma tussiutit tapiisa akuerineqarlutik atortussanngortinneqarnissaat pillugit Naalakkersuisut Biskoppip innersuussutaa naapertorlugu aalajangersagaliorsinnaapput.
		§ 7, imm. 3. Naalakkersuisut Biskoppimik atorfinitsitsillutillu soraarsitsisassapput.
Ilageeqarneq pillugu Inatsisartut inatsisaat nr. 9, 19. maj 2010-meersoq	§ 9, imm. 1. Ilagiit sinniisaasa inassuteqaateqareernerisigut provsteqarfiup ingerlatsineranut ukiumoortumik aningaasanut missingersuusuaq provstip suliarisassavaa, aalajangersakkallu Naalakkersuisunit Biskoppi isumaqatiginiareerlugu aalajangersarneqartut malillugit aningaasanut atugassiissutinut akisussaalluni.	§ 9, imm. 1 Ilagiit sinniisaasa inassuteqaateqareernerisigut provsteqarfiup ingerlatsineranut ukiumoortumik aningaasanut missingersuusuaq provstip suliarisavaa, taamaattoq tak. § 6, aalajangersakkallu Naalakkersuisunit Biskoppi isumaqatiginiareerlugu aalajangersarneqartut malillugit aningaasanut atugassiissutinut akisussaalluni.
		§ 14. imm. 2. Palasi imaluunniit ajoqi upperisarsiornermik tunngaveqartumik ilagiinni suliassanik suliaqarnissanut suliassanullu peqataanissamut pisussaajunnaarsinneqarsinnaavoq.
		§ 14, imm. 3. Palasip ajoqilluunniit pineqartup suliaq provstimut saqqummiutissavaa. Provstip suliaq biskoppimut saqqummiutissavaa kingornatigullu biskoppip

		aalajangissavaa palasi ajoqiluunniit suliami tassani suliaqarnissamik pisussaajunnaarsinneqarsinnaaners oq.
Ilageeqarneq pillugu Inatsisartut inatsisaat nr. 9, 19. maj 2010-meersoq	§ 15, imm. 4. Naalackersuisut Biskoppi isumaqatigiinniareerlugu palaseqarfiup ingerlatsinissaa pillugu aalajangersagaliussapput.	§ 15, imm. 4. Naalackersuisut Biskoppi isumaqatigiinniareerlugu atuagarsuarnik allattuisarneq pillugu aalajangersagaliussapput.
Ilageeqarneq pillugu Inatsisartut inatsisaat nr. 9, 19. maj 2010-meersoq	§16, imm. 4. Provsteqarfimmi ilagiit sinniisaasa ataatsimiinnerini tamani provsti peqataanissamut pisinnaatitaavoq.	§ 16, imm. 4. Provsti provsteqarfimmi tamarmiusumi taasisinnaatitaanani ilagiit sinniisaasa ataatsimiinneranni peqataasinnaatitaavoq.
Ilageeqarneq pillugu Inatsisartut inatsisaat nr. 9, 19. maj 2010-meersoq	§ 18, imm. 4, oqaaseqatigiit 2. Allattaaviup akuerineqartup assilineqarnera provstimut paasissutissatut nassiunneqassaaq.	§ 18, imm. 4, oqaaseqatigiit 2. Allattaaviup akuerineqartup assilineqarnera provstimut biskoppimullu paasissutissatut nassiunneqassaaq.
Ilageeqarneq pillugu Inatsisartut inatsisaat nr. 9, 19. maj 2010-meersoq	§ 20, imm. 1. Ilagiit sinniisaasa palaseqarfimmi oqaluffiit illutaat toqusullu inaat aalajangersakkat Naalackersuisunit aalajangersarneqartut malillugit nakkutigissavaat. Taakku isumannaatsumik aserfallatsaalinissaat provstip isumagissavaa.	§ 20, imm. 1. Palasi atuagarsuarnik allattuisoq palaseqarfimmi oqaluffiit illuutaat toqusullu inaat taakkununga ilanngullugit Naalackersuisunit aalajangersarneqartut malillugit nakkutigissavaat. Nakkutilliineq najukkami ilagiit sinniisaat suleqatigalugit pissaaq. Palasi atuagarsuarnik allattuisoq palaseqarfimmi nakkutilliineq pillugu ukiumoortumik nalunaarusiamik provstimut nassiussissaaq. Illuutit isumannaatsumik aserfallatsaalinissaat provstip isumagissavai.
Ilageeqarneq pillugu Inatsisartut inatsisaat nr. 9, 19. maj 2010-meersoq	§ 21, imm. 1. Ilagiit sinniisaasa oqaluffinnik toqusullu inaannik sananissamut,	§ 21, imm. 1. Ilagiit sinniisaasa oqaluffinnik toqusullu inaannik sananissamut, aaqqissornissaannut, aserfallatsaaliornissaannut

	<p>aaqqissornissaannut pinnersarnissaannullu kiisalu init naalagiartarfittut atorneqartut (atuarfiit naalagiartarfiutigisut) aaqqissornissaannut pinnersarnissaannullu siunnersuutit palasimut atuagarsuarnik allattuisuusumut saqqummiutissavaat.</p>	<p>pinnersarnissaannullu kiisalu init naalagiartarfittut atorneqartut (atuarfiit naalagiartarfiutigisut) aaqqissornissaannut pinnersarnissaannullu siunnersuutit palasimut atuagarsuarnik allattuisuusumut saqqummiutissavaat.</p>
<p>Ilagiinni atorfinititsisarnerit pillugit Inatsisartut peqqussutaat nr. 8, 30. oktober 1998-imeersoq</p>	<p>§ 1, imm. 1. Ilagiinni kalaallini palasitut atorfinni atorfinitinneqarsinnaapput: 1) inuit Ilisimatusarfimmi upperisarsiornermi bachelorgradimik angusisimasut imaluunniit danskite universitetianni upperisarsiornermik kandidatit soraarummeersimasut aamma pastoralseminariumimi ilinniartitaanermik naammassinnissimasut, 2) inuit imatut ilinniagaqarsimasut piginnaassutsinut tunngatillugu Ilinniarfissuarmi ilinniartitsisut ilinniartitaanermut naleqqiunneqarsinnaasumik ilinniagallit, tamatumalu saniatigut kristumiutut upperisarsiornermik annertunerusumik ilinniagaqarsimasut malittarisassat Naalakkersuisut aalajangersagaat malillugit aamma 3) inuit palasiusimasut imaluunniit ilagiinni danskini</p>	<p>§ 26 a, imm. 1. Kalaallit Nunaanni ilagiinni palasitut atorfinni atorfinissinnaapput: 1) inuit upperisarsiornerup tungaatigut Ilisimatusarfimmi bachelorit naammassinnissimasut imaluunniit danskite universitetianni upperisarsiornerup tungaatigut kandidatit soraarummeersimasut kingornatigullu pastoralseminariumimi ilinniarnermik ingerlatsisimasut, 2) inuit ilisimasat tungaasigut ilinniarfissuarmi ilinniartitsisunngorniarnermut nallersuussinnaasumik ilinniarsimasut, tamatumalu saniatigut kristumiussutsimut ilisimatusarnermi malittarisassat Naalakkersuisunit aalajangersarneqartut malillugit ingerlaqqiffiusumik ilinniarsimasut, aammalu 3) inuit ilagiinni danskite naalagaaffiata tapersersugaanni palasiusimasut imaluunniit palasiunissamut piumasaqaatinik naammassinnissimasut.</p>

	palasiunissamut piumasaqaatinik naammassinnissimasut.	
Ilagiinni atorfinitsitsisarnerit pillugit Inatsisartut peqquussutaat nr. 8, 30. oktober 1998-imeersoq	§ 1, imm. 2. Palasit ilagiinnut danskinut ilaasortaassapput.	§ 26 a, imm. 2. Kalaallit Nunaanni Ilagiinni palasit ilagiinni danskit naalagaaffiata tapersersugaanni ilaasortaassapput.
Ilagiinni atorfinitsitsisarnerit pillugit Inatsisartut peqquussutaat nr. 8, 30. oktober 1998-imeersoq	§ 1, imm. 3. Aammattaaq kalaallit oqaasiinik ilisimasaqarnissaq piumasaqaataavoq, malittarisassat Naalakkersuisunit ilusilersorneqartut naapertorlugit.	§ 26 a, imm. 3. Kalaallit Nunaanni Ilagiinni palasit malittarisassat Naalakkersuisunit suliarineqartut naapertorlugit kalaallit oqaasiinik ilisimasaqassapput.
Ilagiinni atorfinitsitsisarnerit pillugit Inatsisartut peqquussutaat nr. 8, 30. oktober 1998-imeersoq	§ 1, imm. 4. Naalakkersuisut aalajangersaasinnaapput ilagiit kalaallit ilinniarsiini palasinik ilinniartitsinermut ilinniartitseqqittarnermullu ilinniartitaanermut peqataasimanissaq palasit atorfinissagaanni piumasaqaataasoq. Tamanna pillugu malittarisassanik erseqqinnerusunik Naalakkersuisut aalajangersaasinnaapput tassunga ilaallutik pikkorissarnermi akissarsiaqarneq.	§ 26 a, Imm. 4. Palasit ilinniarnernannut ilinniaqqinnerannullu ilagiit ilinniarsianni ilinniarnermut peqataasimanissaq palasit atorfinitsitsinissamut piumasaqaataanissaa Naalakkersuisut aalajangersinnaavaat. Tamanna pillugu malittarisassanik erseqqinnerusunik Naalakkersuisut aalajangersaasinnaapput, tassunga ilaalluni pikkorissarnermi akissarsiaqarneq.
Ilagiinni atorfinitsitsisarnerit pillugit Inatsisartut peqquussutaat nr. 8, 30. oktober 1998-imeersoq	§ 2. § 1, imm. 1-imi piumasaqaataasunik naammassinnissimangitsup palasit atorfimmut qinnuteqaateqarnissaanut Naalakkersuisut immikkut ittumik akuersissuteqarsinnaapput.	§ 26 b. Naalakkersuisut biskoppip inassuteqareerneratigut inuk § 26 a, imm. 1-imi piumasaqaatinik naammassinnissimangitsup palasit atorfimmi atorfinitsinneqarnissaanut immikkut ittumik akuerisinnaavaat.

<p>Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-imeersoq</p>	<p>§ 3. Ilinniartitaanermut tunngatillugu piumasagaatit allat inunnik piumasagaatinik taakkuninnga naammassinnissimasunik amigaateqartoqartillugu § 1, imm. 1, nr. 1 aamma nr. 2-mut taarsiullugit atorneqarsinnaanerannut aalajangersakkanik Naalakkersuisut aalajangersaasinnaapput.</p>	<p>§ 26 c. Naalakkersuisut biskoppip inassuteqareerneratigut ilinniarnep tungaatigut piumasagaatinik § 26 a, imm. 1, nr. 1 aamma nr. 2-mi taaneqartunut taarsiullugu aalajangersakkanik aalajangersaasinnaapput inunnik piumasagaatinik taakkuninnga naammassinnissinnaasunik amigaateqartoqassappat.</p>
<p>Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-imeersoq</p>	<p>§ 4. Kinaluunniit ilagiinni kalaallini palasit atorfinitinneqartoq biskoppimit soraarummeersinneqarsimassaaq, palasinngortitaasimassalluni, palasit neriorsuummik atsiorsimassalluni aamma biskoppip uppersaasigaanik palasit sulisinnaangortitaasimassalluni .</p>	<p>§ 26 d. Kinaluunniit Kalaallit Nunaanni ilagiinni palasit atorfinitinneqartoq atorfinitinnissamut piumasagaatit biskoppimit soraarummeersinneqarsimassaaq, ivertinneqarsimassaaq, ilagiinnut palasit neriorsuisimassaaq biskoppillu uppersaasigaanik palasit sulisinnaangortitaasimassalluni.</p>
<p>Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-imeersoq</p>	<p>§ 6. § 7 malillugu inassuteqartoqartinnagu ajornangippat biskoppip, imaluunniit provstip biskoppimit piginnaatitaasup, aamma ilagiit sinnersaannut ilaasortassatut qinigaasimasut akornanni ataatsimeeqatigiittoqassaaq, tassani qinnuteqaateqartut pillugit ilisimatitsissuteqartoqassalluni . Qinnuteqarnissamut killiliussap naanerata kingornatigut sapinngisamik piaartumik ataatsimiinnissaq biskoppimit</p>	<p>§ 26 e. § 26 f malillugu oqaaseqaammik tunniussisoqarnissaa pitinnagu sapinngisamik biskoppip imaluunniit provstip biskoppip piginnaatitaata aamma ilagiit sinniisaanni ilaasortat qinikkat akornanni qinnuteqaatinik ilisimatitsiffiusumik ataatsimiittoqassaaq. Ataatsimiinnissaq qinnuteqarfissamut piffissaliussap kinguninnguatigut biskoppimit aalajangerneqassaaq biskoppimillu provstimilluunniit biskoppimit piginnaatinneqartumit aqunneqassalluni. Ilagiit</p>

	<p>ullussalerneqassaaq, biskoppimillu provstimilluunniit aqunneqassalluni. Ilagiit sinnersaasa kissaateqarnerisigut imaluunniit biskoppip kissaatiginartippagu biskoppip ilagiillu sinnersaannut ilaasortat akornanni ilisimatitsissuteqarniarluni ataatsimeeqqittoqassaaq.</p>	<p>sinniisaannit ataatsimit aralinnilluunniit qinnuiginnittoqareerneratigut imaluunniit tamanna biskoppimit kissaatigineqarpat biskoppip ilagiillu sinniisaasa akornanni ilisimatitsiffiusumik allamik ataatsimiittoqassaaq.</p>
<p>Ilagiinni atorfinititsisarnerit pillugit Inatsisartut peqquussutaat nr. 8, 30. oktober 1998-imeersoq</p>	<p>§ 6, imm. 2. Imm. 1-imi ilisimatitsissuteqarniarluni ataatsimiinnissamut piffissaliussatigut killiliussanut periaasissanullu malittarisassat Naalakkersuisut aalajangersassavaat.</p>	<p>§ 26 e, imm. 2. Ilisimatitsiffiusumik ataatsimiinnermut imm. 1-imi taaneqartumut piffissaliussanut periusissanullu malittarisassanik Naalakkersuisut aalajangersaasinnaapput.</p>
<p>Ilagiinni atorfinititsisarnerit pillugit Inatsisartut peqquussutaat nr. 8, 30. oktober 1998-imeersoq</p>	<p>§ 7, imm. 1. Palaseqarfimmi ilagiit sinnersaannut ilaasortatut qinigaasimasut palasitut atorfinni inuttaqanngitsuni atorfinititsinissat pillugit inassuteqaateqassapput. Inassuteqaateqarneq ataatsimeeqatigiinnermi ajornanngippat pissaaq.</p>	<p>§ 26 f. Palaseqarfimmi palasitut atorfinnut inuttaqanngitsunut atorfinititsinissaq pillugu palaseqarfimmi ilagiit sinniisaanni qinikkat oqaaseqaammik tunniussaqaassapput. Sapinngisamik biskoppip ilisimatitsiffiusumik ataatsimiititsinerata kinguninngua oqaaseqaateqarfiusumik ataatsimiittoqassaaq. Oqaaseqaat taasiffissatut pingaarnersiorlugu tunniunneqassaaq, ilagiillu sinniisaat ajornanngippat peqataasut 3-t taaneqarsinnaasuni piukkunneqartunik taaneqarnerpaanik nalunaaruteqassallutik.</p>
		<p>§ 26 f, imm. 2. Biskoppi sapinngisamik qinnuteqartunik pingasunik pingaarnersiorlugit tullerriaarneqartunik</p>

		inassuteqassaaq. Biskoppip qinnuteqaatit ilagiit sinniisaasa oqaaseqaataannik ilallugit kiisalu nammineq inassuteqaanni ilanngullugu Naalakkersuisunut nassiuatissavai.
		§ 26 g. Palasitut atorfimmi kina atorfinitsinneqassanersoq Naalakkersuisut aalajangissavaat, tak. §§ 26 e aamma 26 f. Qinnuteqartoq biskoppip inassuteqaataanut ilanngunneqanngitsoq atorfinitsinneqarsinnaanngilaq biskoppi oqaaseqaateqarsimatinnagu.
Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-imeersoq	§ 8. Naalakkersuisut qinnuteqartumik atorfinitsitsinnaanngillat, ilagiit sinniisaannit innersuunneqarnikuunngittumi k. Qinnuteqartoq taasisitsinermi taasisunit tamanit qinerneqartoq atorfininnissamut innersuunneqassaaq. Immikkut pisoqartillugu Naalakkersuisut aalajangersinnaavaat atorfinittussarsiorneq saqqummeqqinneqassasoq, nutaamillu aalajangiisoqassasoq.	§ 26 h. Qinnuteqartoq ilagiit sinniisaasa oqaaseqaataannut ilanngunneqarsimanngitsoq Naalakkersuisut atorfinitsinnaanngilaat. Qinnuteqartoq ilisimatitsiffiusumik ataatsimiinnermi siullermik taasisoqarnerani tamanit qinerneqartoq peqataanillu biskoppip inassuteqaataani ersertoq atorfimmi atorfinitsinneqassaaq.
Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-imeersoq		§ 26 h, imm. 2. Immikkut ittumik pissutissaqartoqarpat nutaamik inuttassarsiuisoqarnissaa nutaamillu inassuteqartoqarnissaa Naalakkersuisut aalajangersinnaavaat.
Ilagiinni atorfinitsitsisarnerit pillugit Inatsisartut peqqussutaat nr. 8, 30.	§ 9. Suliffeqarfiit inuilluunniit aalajangersimasukkuutaat ilagiit sinniisaannik pilersitsiviusimannngitsut	§ 26 i. Suliffeqarfinnut inunnulluunniit ilagiit sinniisaannik pilersitsiffiusimannngitsunut

<p>oktober 1998-imeersoq</p>	<p>tamakkiisumik ilaannakortumilluunniit sullinneqarnissaat siunertaralugu palasitut atorfiit pilersinneqarsimasut inuttalerneqartarneranni periusissat pillugit malittarisassanik immikkut ittunik Naalakkersuisut aalajangersaasinnaapput.</p>	<p>sullissinissaq siunertaralugu palasitut atorfiit tamakkiisumik ilaannakuusumilluunniit pilersinneqartut inuttalernissaanni periusissanut malittarisassanik Naalakkersuisut aalajangersaasinnaapput. Tamanna aamma atuuppoq ukioq ataaseq angullugu sivikinnerusumik atorfinitsitsisoqassatillugu.</p>
		<p>§ 26 j. § 26 k malillugu oqaaseqaammik tunniussisoqarnissaa pitinnagu sapinngisamik biskoppip imaluunniit provstip biskoppip piginnaatitaata aamma ilagiit sinniisaanni ilaasortat qinikkat akornanni qinnuteqaatinik ilisimatitsiffiusumik ataatsimiittoqassaaq. Ataatsimiinnissaq qinnuteqarfissamut piffissaliussap kinguninnguatiqut biskoppimit aalajangerneqassaaq biskoppimillu provstimilluunniit biskoppimit piginnaatinneqartumit aqunneqassalluni. Ilagiit sinniisaannit ataatsimit arlalinnilluunniit qinnuiginnittoqareerneratigut imaluunniit tamanna biskoppimit kissaatigineqarpat biskoppip ilagiillu sinniisaasa akornanni ilisimatitsiffiusumik allamik ataatsimiittoqassaaq.</p>
		<p>§ 26 j, imm. 2. Ilisimatitsiffiusumik ataatsimiinnermut imm. 1-imi taaneqartumut piffissaliussanut periusissanullu malittarisassanik Naalakkersuisut</p>

		aalajangersaasinnaapput.
Ilagiinni atorfinitsitsisarnerit pillugit Inatsisartut peqqussutaata allanngortinneqarneranik Inatsisartut peqqussutaat nr. 11, 21. maj 2002-meersoq	§ 10, imm. 1. Palaseqarfinni domprovstip provstilluunniit domprovstitut provstitulluunniit suliffigisassaani ilagiit sinniisaattut qinikkat sapinngisamik qinnuteqartut pingasut pillugit pingaarnersiorlugit tullerriiarlugit inissillugit oqaaseqaateqassapput.	§ 26 k. Provsteqarfinmi ilagiit sinniisaat qinikkat provsteqarfinmi provstitut imaluunniit domprovstitut atorfinnut inuttaqanngitsunut atorfinitsitsinissaq pillugu oqaaseqaateqassapput. Sapinngisamik biskoppip ilisimatitsiffiusumik ataatsimiititsinerata kinguninngua ilisimatitsiffiusumik ataatsimiittoqassaaq.
Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-meersoq	§ 10, imm. 2. Biskoppi qinnuteqaateqartut pingasut pingaarnersiorlugit tullerriiarlugit inissineqartut pillugit sapinngisamik oqaaseqaateqartinniarneqassaaq. Biskoppip qinnuteqaatit ilagiit sinniisaannut ilaasortat namminerlu oqaaseqaatiminnik ilanngussivigalugit Naalakkersuisunut nassutissavai.	§ 26 k, imm. 2. Biskoppi sapinngisamik qinnuteqartunik pingasunik pingaarnersiorlugit tullerriiarneqartunik inassuteqassaaq. Biskoppip qinnuteqaatit ilagiit sinniisaasa oqaaseqaataannik ilallugit namminerlu inassuteqaanni ilanngullugu Naalakkersuisunut nassutissavai.
Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-meersoq	§ 10, imm. 3. Atorfimmut kina ivertinneqassanersoq Naalakkersuisut aalajangissavaat. Qinnuteqaateqartumik biskoppip oqaaseqaataanut ilaanngitsumik biskoppi oqaaseqaateqarteqqaarnagu atorfinitsitsisoqassanngilaq.	§ 26 l. Naalakkersuisut aalajangissavaat provstitut imaluunniit domprovstitut atorfimmut kina atorfinitsinneqassanersoq. Qinnuteqartoq biskoppip inassuteqaataanut ilanngunneqanngitsoq atorfinitsinneqarsinnaanngilaq biskoppi oqaaseqaateqartinnagu.
		§ 26 l, imm. 2. Provsti palaseqarfinmi provsteqarfiup allaffiata inissisimaffiani najugaqarlunilu sulissaaq.
Ilagiinni	§ 12. Provstit allaffiini atorfiit	§ 26 m. Biskoppi Naalakkersuisut

atorfinititsisarnerit pillugit Inatsisartut peqqussutaat nr. 8, 30. oktober 1998-imeersoq	pilersinneqartarnerat atorunnaarsinneqartarnerallu pillugit Naalakkersuisut aalajangiisassapput. Provsti atorfinnut taakkununga atorfinititsisassaaq soraarsitsisassallunilu.	isumaqatiginiareerlugit Kalaallit Nunaanni ilagiit ataanni ilagiinni sulisunut allaffeqarfinnilu sulisunut atorfiit pilersinnissaat atorunnaarsinnissaallu pillugit aalajangersakkanik aalajangiisaaq.
Ilagiinni atorfinititsisarnerit pillugit Inatsisartut peqqussutaat nr. 8, 30. oktober 1998-imeersoq	§ 11, stk. 1. Provstip ilagiit sinniisaannut ilaasortanik tusarniaareerneratigut ajoqinik pattattunillu atorfinititsisoqartarlunilu soraarsitsisoqartassaaq.	§ 26 m, imm. 2. Biskoppip, palasimik atuagarsuarnik allattuisumik ilagiillu sinniisaannik tusarniaareernerup kingorna, ajoqinik organistinillu atorfinititsinissamut soraarsitsinissamullu provstit piginnaatissinnaavai.
Ilagiinni atorfinititsisarnerit pillugit Inatsisartut peqqussutaat nr. 8, 30. oktober 1998-imeersoq	§ 11, imm. 2. Provstip ilagiit sinniisaannut ilaasortanik tusarniaareerneratigut ajoqinik pattattunillu atorfinititsisoqartarlunilu soraarsitsisoqartassaaq.	§ 26 m, imm. 3. Biskoppip, palasimik atuagarsuarnik allattuisumik ilagiillu sinniisaannik tusarniaareernerup kingorna, oqaluffinni ikiortinut, soorlu pedelit, eqqiaasut il.il., atorfinititsinissamut soraarsitsinissamullu provstit piginnaatissinnaavai.
		§ 26 m, imm. 4. Provsteqarfinni palaseqarfinnilu allaffinni allaffissornikkut sulisunik atorfinititsinissamut soraarsitsinissamullu provstit biskoppip piginnaatissinnaavai
		§ 26 n. Atermik allanngortitsiniarluni kalerriuteqarnermi tamatigut akiliuteqartoqartassaaq.
		§ 26 n, imm. 2. Atermik allanngortitsineq akuerineqartoq atermik allanngortitsinermut uppersaammik aamma inunngornermut/kuisinnermut uppersaammik imaluunniit inunngornermut/atserneqarnermut uppersaammik

		<p>uppernarsarneqassaaq. Uppernarsaammik taamaattumik tunniussinermi immikkut ittumik akiliuteqartoqassanngilaq.</p>
		<p>§ 26 n, imm. 3. Ilagiit oqartussaasulluunniit allat aqqutigalugit atermik allanngortitsinerup kingunerisaanik uppernarsaatnik allanik tunniussinermi tunniusseqqinnermituulli akiliummik akiliuteqartitsisoqassaaq, tak. § 26 o.</p>
		<p>§ 26 o. Atuagarsuit imarisaat aqqutigalugit uppernarsaammik tunniusseqqinnermi akiliutigineqartussat ukuupput: a) Inunngornermut/kuisinnermut uppernarsaat b) Inunngornermut/atserneqarnermut uppernarsaat c) Inunngornermut uppernarsaat d) Katinnermut uppernarsaat e) Toqusumik nalunaarut.</p>
		<p>§ 26 p. Oqaatsit marluiit atorlugit, kalaallisut/tuluttut, atuagarsuit imarisaat aqqutigalugit uppernarsaammik tunniussinermi akiliuteqartoqartassaaq.</p>
		<p>§ 26 q. Oqartussat aningaasartuutaannut matussusiinissamut atorneqartussanut akiliutigineqartut akilersinnissaannut akiliutillu annertussusissaannut malittarisassat sukumiinerusut aalajangersarnissaannut Naalakkersuisut piginnaatinneqarput, tak. §§ 26 n –</p>

		26 p.
Ilageeqarneq pillugu Inatsisartut inatsisaat nr. 9, 19. maj 2010-meersoq	§ 28, stk. 3. Biskoppip aalajangigaat aalajangiinermut sapaatip-akunneri 4-at qaangiutsinnagit Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmut naammagittaalliuutigineqarsin naapput. Naalakkersuisoqarfiup aalajangiineri inaarutaapput.	§ 28, imm. 3. Biskoppip aalajangigai aalajangiinermut sapaatip-akunneri 4-at qaangiutsinnagit Naalakkersuisunut naammagittaalliuutigineqarsinnaaput. Aalajangiinerit annerusumik upperisarsiornermut tunngassuteqartut taamaallaat misilinneqassapput inatsisitigut tunngavinnut attuumassuteqarpata.

3. Pisortanut allaffissornikkut aningaasaqarnikkullu kingunerisassat

Immikkoortoq manna inatsisissatut siunnersuutip kingunerisaanik pisortanut allaffissornikkut aningaasaqarnikkullu sunniutaasussanut taamaallaat tunngassuteqarpoq.

3.1 Aningaasaqarnikkut kingunerisassat

Siunnersuut ilageeqarnermi suliassaqarfimmut aningaasaliissutinik amerlisitsinissamut piunasaqaateqartitsinnigilaq, ullumikkut kontuni pingaarnerni ukunani aningaasaliiffigineqartarmat:

30.18.02 Kalaallit Nunaanni ilagiit

30.18.03 Ajoqissanik organistinillu ilinniartitsineq

Nalilerneqarpoq allannguutit inatsisissatut siunnersuutip kingunerisassai ilageeqarnermut aningaasaliissutini maanna akilerneqartartunut aningaasaliiffigineqarsinnaassasut.

Taamatuttaa q kapitali 8-mi Kalaallit Nunaanni ilagiinni suliassaqarfiit ilaanni akiliutigineqartartunik atuutilersitsinissaq Naalakkersuisunut ukiumut 150.000 kr.-it ataannagit isertitaqaateqarfiusarnissaannik kinguneqaateqartitsinissaa naatsorsuutigineqarpoq.

3.2 Allaffissornikkut kingunerisassat

Nutarterineri ilagiinni atorfeqartitsinermut tunngasut ilanngunneqarnerannut periuseq pingaarnertut tunngaviusunik (Ilageeqarneq pillugu inatsit) atuuttunik maleruagassanik nalinginnaasumik maleruagassanik aamma nutarterinerup ilagaa. Aqutsineri oqartussaasunut inunnullu tamanna pisariillisaaneruvoq, tassalu Ilageeqarneq pillugu inatsit taamaaliornikkut ilageeqarnermi maleruagassanik sapinngisamik amerlanerpaanik katersuuffinngortussaassammat.

Allanguutissatut siunnersuutip § 20-mi oqaluffiit illutaannik nakkutilliisarnissamut suliassaq ilagiit sinniisaannit palasimut atuagarsuarnik allattuisumut ilagiit sinniisaat *suleqatigalugit* suliassanngorlugu nuunniarpaa. Siunnersuutip siunniuppaa suliassamut akisussaaffiliinissaq, taamatutaaq pisortat sulisorisaasa ilaannut.

Allanguutissatut siunnersuut kapitalit kingullianni aalajangersakkanik ilaqartinneqarpoq, biskoppip tamakkiisumik aalajangiisarnerani atuuttup ingerlatitseeqqissinnaaneq killiliiffigalugu.

4. Inuussutissarsiuteqartunut allaffissornikkut aningaasaqarnikkullu kingunerisassat
Siunnersuut inuussutissarsiuteqartunut allaffissornikkut aningaasaqarnikkulluunniit kinguneqarnissaa ilimagineqanngilaq.

5. Avatangiisinut pinngortitamullu kingunerisassat
Siunnersuut avatangiisinut pinngortitamulluunniit kinguneqarnissaa ilimagineqanngilaq.

6. Innuttaasunut allaffissornikkut kinguneqaatissat
Ilageeqarneq pillugu inatsisip 1. august 2010-mi atuutilersup ilaneqarnerani, tassanilu innuttaasut ilageeqarnerup aaqqissugaanerani annertunerusumik qulaajaalluarsinnaalernerannik imaqartinneqartup, inatsisissatut siunnersuummi allanguutissatut (ilassutitut) aalajangersakkat nalinginnaasumik malitsigissavai. Inatsisissatut siunnersuutip kapitalit 7-iata, ilageeqarneq pillugu inatsisip naleqqussarnerata kingorna, ilagiinni atorfinitsitsisarnermi suleriaatsit maannakkut atuuttut ilassuteqaatigissavai. Tamanna innuttaasunut pisariillisitsinissamik kinguneqassaaq.

Kapitali 8 innuttaasunut annertuumik sunniuteqaateqartitsilissaaq. Kapitalimi atit allangortinneqartarnerannut (atit tamakkerlugit) atuisut akiliuteqartalersinneqassapput, kiisalu ilagiit uppersaataannik tunniusseqqittarneq ilanngullugu. Akiliutit annertussusaat aningaasartuutinit suliassamik suliaqarnermut tunngasunit amerlanerussanngillat, ilimagineqarsinnaallunilu 500 koruuni qaagissanngikkaa. Akileeqquseriaaseq akiliutillu annertussusaat nalunaarutikkut aalajangersarneqassapput. Tamanna tunngavigalugu kingorna maleruagassat allanguuteqartinneqarnerat ilaatigut innuttaasunut tamanut saqqummiunneqassaaq.

Allanguutissatut siunnersuummi kapitali kingullermi aalajangersakkamik ilaqartinneqarpoq biskoppip aalajangiineri maanna atuuttumut killiliisuusussaq.

7. Kingunerisassat pingaarutillit allat
Siunnersuut kingunerisassanik pingaarutilinnik allanik nassataqarnissaa ilimagineqanngilaq.

8. Oqartussaasunut soqutigisaqaqatigiinnullu tusarniaaneq

Inatsisissatut siunnersuut piffissami ulloq Oktobarip 24-aniik novembarip 28-iat ilanngullugu tusarniaassutigalugu nassiunneqarpoq.

Siunnersuut ukununga tusarniaatissatut nassiussuunneqarpoq:

Biskoppi	Inuussutissarsiornermut Suliffeqarnermullu Naalakkersuisoqarfik
Palasit tamarmiusut	Peqqissutsimut Naalakkersuisoqarfik
Provstit tamarmiusut	Ilinniartitaanermut Ilisimatusarnermullu Naalakkersuisoqarfik
Ilagiit sinniisaat tamarmiusut	Nunamut Namminermut, Pinngortitamut Avatangiisinullu Pisortaqaarfik
Kalaallit palasiisa peqatigiiffiat	Aatsitassanut Pisortaqaarfik
Ajoqit pattattullu peqatigiiffiat	Nunanut allanut tunngasunut Pisortaqaarfik
Ilageeqarnermut ministereqarfik	Pisortaataasut Kattuffiat
Biskoppit peqatigiiffiat	Kalaallit Nunaanni qaffasissumik atorfillit Kattuffiat
Danskit palasiisa peqatigiiffiat	KANUKOKA
Danmarkimi oqaluffiit ikiortaasa peqatigiiffiat	KANUNUPE
Århus Universitet – Upperisarsiornermut ilinniarfik	NUSUKA
Københavns Universitet – Upperisarsiornermut ilinniarfik	Atorfillit Kattuffiat
Siulittaasup Naalakkersuisoqarfia	Silisitsisut Kattuffiat (GA)
Ineqarnermut, Attaveqarnermut Angallanermullu Naalakkersuisoqarfik	IMAK
Aningaasaqarnermut Naalakkersuisoqarfik	SIK
Aalisarnermut, Piniarnermut Nunalerinermullu Naalakkersuisoqarfik	Ilisimatusarfik

Tusarniaanermi tusarniaanermi akissuteqaatit 10-t pissarsiarineqarput, taakkunanga ukua oqaaseqaateqaratik nalunaarsimallutik: Aatsitassanut Pisortaqaarfik, Sulisitsisut Peqatigiiffiat, Naligiissitaanermut Ilageeqarnermullu Ministerieqarfik, Nunamut Namminermut, Pinngortitamut Avatangiisinullu Naalakkersuisoqarfik

Tusarniaaffigisat tulliuttut siunnersuummut oqaaseqaateqarput: KANUKOKA, IMAK, Biskoppeqarfik, Atorfillit Kattuffiat, Qaqortumi Ilagiit Sinniisaat aamma Aningaasaqarnermut Naalakkersuisoqarfik.

KANUKOKA

KANUKOKA-p tusarniaanermut akissuteqaataani takuneqarsinnaavoq uppersaatinik tunniussaqaqqinnermi periutsimik § 26 o-mi allaaserineqartumit aaqqiisummik eqaannerusumik nassaarnissamut Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoqarfik kaammattorneqartoq. Uppersaatipt siullermeerlugu tunniunneqarnerata kingorna uppersaatipt qarasaasiamut pappialanngorlugulu toqqorneqartarnissaa KANUKOKA-p siunnersuutigaa, tamatuma kingorna innuttaasut Sullissiviup qarasaasiakkut iserfiani Uanga Quppernera aqputigalugu qarasaasiakkut toqqorneqarnera pisariaqarpat aasinnaassavaat, imaluunniit kommunimi innuttaasunik sullissivik aqputigalugu imaluunniit palaseqarfimmut allagaqarnermikkut piniarsinnaallugu.

Uppersaatinik tunniusseqqinnermi suleriaaseq innuttaasunut palasinullu pisariillisinniarlugu periarfissat eqqarsaatigalugit Ilageeqarnermut Naalackersuisoqarfiup Sullissivik, KANUKOKA Biskoppeqarfillu oqaloqatigalugit aallartippaa. Qarasaasiakkut attaveqaatinik tunngaveqartumik aaqqiisuteqarnissaq periarfissaagaluartoq, uppersaatinik palaseqarfimmit piniaqqinnermut suli akiliuteqartitsisoqartassaaq.

IMAK

IMAK-ip siulersuisui Kalaallit Nunaanni Ilagiinnut malittarisassat pisariillisarneqarnerannut naammagisimaarinnippoq, ilaatigut Kalaallit Nunaanni Ilagiinni atorfinitsitsisarnernut malittarisassat sinnerinut ilanngullugit allanneqarmata. Tamatuma saniatigut atinik allanngortitsinnermi, uppersaatinik piniaqqinnermi il.il. akiliuteqartitsisarnissamut inatsisitigut tunngavissiisoqarnissaanut siulersuisut isumaqataapput.

Biskoppeqarfik

Biskoppeqarfiup siunnersuutigaa § 14, imm. 2 imatut allanngortinneqassasoq ”Palasi ajoqiluunniit upperisarsiornermik tunngaveqartumik oqaluffimmi suliassanut pisussaajunnaartinneqarsinnaavoq.”

§ 14, imm. 3-mut atatillugu biskoppeqarfik isumaqarpoq aalajangersagaq peerneqartariaqartoq, ”atorfeqartitaaneq aqputigalugu” ilageeqarnermi ingerlatsinnermut oqartussaasunut atuutereersoq tunngaviusumik pineqarmat.

Immikkoortunut allanut tunngavilersuutitut § 16, imm. 5 naapertuuttunngortinneqartariaqarpoq, oqaatsip ”taasisinnaatitaanani” peerneratigut.

§ 18, imm. 4, oqaaseqatigiit aappaanni ”biskoppi” ilannguneqassasoq siunnersuutigineqarpoq.

Biskoppeqarfik isumaqarpoq § 21-mi suliassaq erseqqinnerulersinniarlugu, § 21, imm. 1-imi ilagiit sinniisaasa kingorna ”-sinnaavoq/-pput” ilanngunneqarnissaa eqqarsaatigineqartariaqartoq. Siunnersuutit palasimut atuagarsuarnik allattuisuusumut

siunissami saqqummiunneqartalernissaannik § 21-mi allannguinerup kinguneqarumaarnera biskoppeqarfiup tunngavilersuutigaa.

Ilageeqarnerup højskolimut aningaasanut inatsimmi kontoqarnissamik § 24-mut aallaqqaammut tunngaviusup maanna peerussimanera Biskoppeqarfiup tikkuarpaa. Ilagiit pillugit Inatsisip akuersissutigineqarnerata kinguneranik konto aningaasanut inatsimmit ukiumi pineqartumi peerneqarpoq.

§ 26 a, imm. 2-mi ”Kalaallit Nunaanni Ilagiit” atorneqartariaqarnerat siunnersuutigineqarpoq.

Biskoppeqarfiup § 14, imm. 2-p ” Palasi imaluunniit ajoqi suliaminik suliaqartilluni upperisarsiormerup tungaatigut pissuteqartumik isumaqaruni sulinermut suliaqarsinnaanani imaluunniit peqataasinnaanani ilagiinni suliassanik suliaqarnissamik pisussaajunnaarsinneqarsinnaavoq”, ”Palasi imaluunniit ajoqi upperisarsiormermik tunngaveqartumik ilagiinni suliassanik suliaqarnissamut pisussaajunnaarsinneqarsinnaavoq.” - mut allanngortinneqarnissaanik siunnersuutaa tusaatissatut tiguneqarpoq. Oqaasertaliussassatut siunnersuutit annertusineqarput, taamaattumik § 14, imm. 2-p imatut oqaasertaqarnissaa toqqarneqarluni ”Palasi imaluunniit ajoqi upperisarsiormermik tunngaveqartumik ilagiinni suliassanik suliaqarnissanut suliassanullu peqataanissamut pisussaajunnaarsinneqarsinnaavoq”.

§ 14, imm. 3-p peernissaanut pissutissaqanngilaq. Inatsit atuisunut sapinngisamik pisariinnerpaasariaqarpoq, aalajangersagarlu nutaaq pineqarmat, siornagut ilagiinni ileqquusut malillugit pisarsimagaluartoq, suleriaaseq inatsimmi erseqqissumik takuneqarsinnaasariaqarpoq. Innuttaasunut ataasiakkaanut paasiuminartuunissaa matumani eqqarsaatigineqarpoq, aammali suliaqarfimmi maannamut inatsisitigut malittarisaaqarsimangitsumi assigiiaartumik suleriaaseqarnissaaq qulakkeerniarneqarpoq.

§ 16-ip tulluarsartariaqarnera isumaqatigineqarpoq, kisiannili § 16, imm. 4-mi ”taasisinnaatitaanani” ilanngunneqassaaq, taamaannera aamma imm. 2-5-mi atuuttoq aamma takuneqarsinnaassammat.

§ 18, imm. 4 oqaaseqatigiit aappaanni ”biskoppi” ilanngunneqarnissaanik Biskoppeqarfiup siunnersuutaa tusaatissatut tiguneqarpoq, siunnersuummullu ilanngunneqarluni.

Aalajangersagaq § 20-mut naapertuuppoq, tassannga takuneqarsinnaagami piffimmi ilagiit sinniisaat suleqatigalugit nakkutilliineq pissasoq. Suleqatigiinneq § 21-mi suli erseqqinnerulersinneqarpoq, tassani takuneqarsinnaagami palasimut atuagarsuarnut allattuisumut ilagiit sinniisaat siunnersuuteqartassasut.

§ 24-mut aallaqqaammut tunngaviusup, ilagiinnut højskolip aningaasanut inatsimmi kontoata atorunnaarsimaneranik Biskoppeqarfiup tikkuanaanera tusaatissatut tiguneqarpoq. Kalaallit

Nunaanni Ilagiit qitiusumit aqunneqarnerat allaffissornikkullu ingerlatsineq biskoppip isumagisarimmagu, kontomi pingaarnermi allannortoqarsimagaluartoq palasit, ajoqit pattattullu ilinniaqqittarnerannut ilinniagaqaqqittarnerannullu Kalaallit Nunaanni Ilagiit nangittumik isumaginnittuusariaqarput.

§ 26 a, imm. 2-mut atatillugu "ilagiinni danskit naalagaaffiata tapersersugaani" pinnagit "Kalaallit Nunaanni Ilagiit" allassimassasut siunnersuutigineqarpoq. Naalakkersuisulli isumaqarput "ilagiinni danskit naalagaaffiata tapersersugaani" inatsisitigut eqqortumik allassimasariaqartoq, Kalaallit Nunaanni Ilagiit ilagiinnut danskit naalagaaffiata tapersersugaanut ilaammata.

Atorfillit Kattuffiat

Atorfillit Kattuffiat (AK) isumaqarpoq Ilageeqarneq pillugu malittarisassat ataatsimoortillugit allanneqarnerat pitsaasuusoq, Kalaallit Nunaanni Ilagiit pillugit inatsisit atuisunut paasiuminarnerulissammata. Tamatuma saniatigut AK-p oqaatigaa immersukkap tusarniaanermut atortunut ilanngullugu nassiunneqartup, siusinnerusukkut inatsisaasumi maannalu inatsisissatut siunnersuummi oqaasertaliussanik imaqartup, allanguutissatut siunnersuut annertuumik paasiuminarsisikkaa.

AK-p tikkuarpaa § 14, imm. 3-mi aalajangersakkami palasit kiffaannngissuseqarnerannut tunngasumi, suiaaqatigiit marluk palasip upperisarsiornermik tunngaveqartumik katitissinnaanngippagit, suiaaqatigiit aappariit katitinneqarnissaasa qanoq qulakkeerneqarnissaat pillugu erseqqissaasoqanngitsoq. Suiaaqatigiit marluk katitinneqarnerat pillugu naalagaaffiup inatsisaata tusarniaassutigineqarneranut allakkiaq AK-p innersuussutigaa.

AK isumaqarpoq palasit atorfii inuttassarsioqqinnissaannut periarfissaq § 26 h-p oqaasertalerneratigut peerneqartoq. Taamaasilluni Naalakkersuisut isumaqarunik piukkunneqartut eqqortunik piginnaaneqanngitsut, Naalakkersuisut atorfinitsitsinnginnissamut periarfissaat peerneqassaaq.

AK-p uppernarsaatini aalajangersimasunik piniarnermi akiliuteqartitsinissap inatsisitigut tunngavissaqalernissaanik allanguutissatut siunnersuut isumaqatigaa. Malittarisassanillu pisariillisaaneq erseqqivissutut isiginngilaa, "atorfinitsitaanermi atorfininnermilu atugassarititaasut", "palasinik atorfinitsitsinerni periuseq", "Provstinik atorfinitsitsinerni periuseq" kiisalu "kapitali 8-mi akiliutit" tamarmik § 26-p ataanut inissinneqarsimammata, paragrafimi ataatsimi suliffiup iluani allaffissornikkut pissutsit aamma suliffiup avataanut allaffissornikkut pissutsit tamarmik ataatsikkut pineqarmata.

Tusarniaanermi akissut tunuliaqutaralugu § 14-imut oqaaseqaatini erseqqissaatigineqarpoq palasi upperisarsiornermut tunngasut pissutigalugit oqaluffimmi suliassanik suliaqarsinnaanngippat pissutsit suut atuutissanersut.

Allannguutissatut siunnersuummi § 26 h, imm. 2-mi takuneqarsinnaavoq pissutsit immikkut ittut atuuppata, atorfirmut inuttassarsieqqittoqarnissaa nutaamillu inassuteqartoqarnissaa Naalackersuisut aalajangersinnaagaat. Inatsit maanna atuuttoq assigalugu atorfinnik inuttassarsieqqinnissamut Naalackersuisut assigisaannik periarfissaqarput.

Paragrafit normuannik naqinnermik malitseqartitamik atuneq allannguutissatut siunnersuutini, inatsisip tamarmiulluni allanngortinneqarluni allanneqaqqinngiffini nalinginnaasumik suleriaasiuvoq. Paragrafinut innersuussisaqattaarnikkut pisariaqanngitsumik paatsiveerusimaartitsinissaq pitsaaliorniarlugu periuseq atorneqartarpoq, inatsimmimi allannguneq sioqqullugu imaluunniit allannguinerup kingorna inatsimmi paragraf x innersuussutigineqarnersoq qularutigineqalersinnaasarami.

Qaortumi Ilagiit Sinniisaat

Ilagiit sinniisaasa siunnersuutigaat § 26 m imatut oqaasertalerneqassasoq:

” § 26 m. Biskoppi Naalackersuisut isumaqatiginiareerlugit Kalaallit Nunaanni ilagiit ataanni ilagiinni sulisunut allaffeqarfinnilu sulisunut atorfiit pilersinnissaat atorunnaarsinnissaallu pillugit aalajangersakkanik aalajangiissaaq, aammalu provsti isumaqatiginiareerlugu provsteqarfiit allaffiini sulisunut atorfiit pilersinnissaat atorunnaarsinnissaallu pillugit aalajangersakkanik aalajangersaasassalluni.

Imm 2. Palasi atuagarsuarnut allattuisuusoq aamma ilagiit sinniisaat tusarniareerlugit Biskoppip provstit piginnaatissavai ajoqinik pattattunillu atorfinitsitsisinnaanermut soraarsitsisinaanermullu.

Imm. 3. Palasi atuagarsuarnut allattuisuusoq aamma ilagiit sinniisaat tusarniareerlugit Biskoppip provstit piginnaatissavai ilagiinni ikiortinik, soorlu pedelinik, eqqiaasutut ikiortinik il.il. atorfinitsitsisinnaanermut soraarsitsisinaanermullu.

Imm. 4. Provsteqarfinni palaseqarfiillu allaffiini allaffissornermik sulisunik atorfinitsitsisinnaanermut soraarsitsisinaanermullu biskoppip provstit piginnaatissavai.

§ 26-mik maanna oqaasertaliinikkut ingerlatsinermut aaqqissuussineq Ilageeqarneq pillugu inatsisikkut pilersinneqartoq takutinneqarpoq. Taamaattumik allannguutissatut siunnersuutigineqartup piviusunngortinnissaa pissutissaqanngilaq.

Aningaasaqarnermut Naalackersuisoqarfik

Aningaasaqarnermut Naalackersuisoqarfiup (AN) kissaatigaa § 26 q-mi oqaasertaliussat kingullit „Inatsisartut inatsisaat manna malillugu akiliutigineqartut Nunatta Karsianut nakkartinneqassapput“ peerneqassasut. AN-ip “Inatsisartut inatsisaat manna malillugu akiliutigineqartut Nunatta Karsianut nakkartinneqassapput” allanneqarnera

pisariaqanngitsumik paasissutissinertut nalilerpaa, akiliutigitinneqartutigummi aningaasartuutiit matussuserneqarnissaat kisiat siunertarineqartarmat.

Tamatuma saniatigut AN-ip tikkuartorpaa akiliuteqartitsisarnerup eqqunneqarneranut atatillugu ilagiinnut aammalu provstit palaseqarfiillu allaffiit allaffissornikkut aningaasartuutit pileriartornissaat ilimanaateqartoq. Tamakkununga ilaasinnaapput kortit atorlugit akiliisitsinermut atortut, tillinnianut isumannaallisaaneq, aningaaserivinni kontonik naatsorsuineq aqutsinerlu, kukkunersuisunit ikiorneqarneq. Akiliutit annertussusissaasa naatsorsorneqarneranni tamakku ilanngullugit naatsorsuutigineqassapput.

„Inatsisartut inatsisaat manna malillugu akiliutigineqartut Nunatta Karsianut nakkartinneqassapput“ peerneqarnissaanik kissaateqarneq tusaatissatut tiguneqarpoq.

Akiliutinik akiliisitsinermut suleriaaseq nalunaarummi immikkoortumi takuneqarsinnaassaaq. Akiliutit annertussusilerlugit aalajangersaanermi sunniuteqaqataasussat suut ilanngullugit eqqarsaatigineqarnissaannik AN-ip tikkuagai nalunaarummi aggersumi ilanngullugit suliarineqassapput.

Aalajangersakkanut ataasiakkaanut oqaaseqaatit

§ 1-imut

Nr. 1-imut

Aalajangersakkap erseqqissaatigaa § 4, imm. 1-ip allannguuteqartinneqarnissaa, tamatuma kingorna Naalakkersuisut biskoppimik isumaqatigiissuteqareernikkut naalagiartarnerit ilagiillu iliuusissaat pillugit aalajangersagaliorsinnaatitaalerlutik, tamatumunngali pisussaaffeqartitsinani.

Nr. 2-mut

Aalajangersakkap erseqqissaatigaa § 4, imm. 2-p allannguuteqartinneqarnissaa, tamatuma kingorna Naalakkersuisut naalagiarnermi ileqqorisassanut, ritualinut, tussiutitut tussiutillu tapiinut biskoppi isumaqatiginiareerlugu aalajangersakkanik Naalakkersuisut siunissami aalajangersaasinnaanannerannik, tamatumunngali pisussaaffeqaratik.

Nr. 3-mut

§ 7, imm. 3-p aalajangersaavigaa, Naalakkersuisut biskoppimik atorfinitsitsinissamut oqartussaassuseqarnissaat.

Namminersorlutik Oqartussat pillugit Folketingip inatsisaata nr. 473-ip, 12. juni 2009-meersup § 23, imm. 4-aata kiisalu § 7, imm. 1-imi nr. 19-ip atuutilersinneqarnerisa kingorna, Ilagiit ataatsimoortumik suliassa qarfissaat isumagisassanngortinneqarpoq, taamatuttaaq suliassa qarfimmi inatsiseqartitsinermi oqartussaaffik Namminersorlutik Oqartussanut isumagisassanngortillugu. Tamatuma kinguneraa siunissami biskoppit Namminersorlutik Oqartussani atorfeqartitaasalernerat.

Folketingip inatsisaa nr. 474, 12. juni 2009-meersumi § 8 naapertorlugu maannakkut biskoppi Namminersorlutik Oqartussani biskoppi qinersinikkut atorfeqartinneqarnissaanik imaluunniit danskit oqartussaasuini atorfeqartitaaginnassanersoq neqeroorfigineqarpoq. Biskoppip Namminersorlutik Oqartussat ataanni atorfeqarnissani toqqarpaa.

Nr. 4-imut

Uma kingorna ”...anigaasatigut akisussaaffik...” allannguut tassaavoq § 6-imut innersuussisoqarnissaa.

Kalaallit Nunaanni Ilagiit pillugit inatsisip 1. august 2010 kingorna atuutilersinneqarmat taanna aqutsiviusimavoq ataasiusoq, taamatuttaarlu 2011-mut anigaasaliisarnermi anigaasanut inatsimmi konto aqqutigalugu (2011-mi 40.97.04) anigaasat pissarsiarisarsimmagat, anigaasanut akisussaaffik Kalaallit Nunaanni Ilagiinnut Naalakkersuisunit atugassanngortinneqartarmata tamanna biskoppimut

tunngatinneqartariaqarpoq, 6-imi aalajangersarneqartutut aqutsinermut immikkoortortatut qaffasinnerpaatut akisussaasussatut nalilernerqartariaqarpoq. Aalajangersakkamili akisussaassuseqarnek provstiniitinnerqarnera erseqqissaatigineqarmat, provstit taakkualu allaffeqarfii aqputigalugit nunap immikkoortuani aningaasanik (ilaannik) aqutsisoqartarnera peqputaassaaq, taamatuttaaq aqutsineq nammineerluni naatsorsuisarnertalik.

Taamatuttaaq nutaamik oqaasertaliinerup inatsisitigut nunap immikkoortuinut isumaginninnermi akisussaaffiup nassuiaruminaassinnaanera naqqippaa (provstip susassaqarfia) taamaalillunilu akisussaaffik qitiusumik aqutsinermi aammalu Kalaallit Nunaanni Ilagiit nalinginnaasumik biskoppip aqutsineranit ilanngunneqanngimmat, tak. inatsimmi § 6.

Nr. 5-imut

Imm. 2-mut

Aalajangersagaq nutaajuvoq palasit ajoqillu ilagiinni iliuusaannut upperisaq peqputigalugu iliuuserissallugit isumaqarfiginngisaannut iliuuseqarnissaannut imaluunniit peqataaffigisassaannut erseqqissumik illersorniarlugit.

Aalajangersagaq tunngavigalugu qanorluunniit iliortoqarsinnaanngilaq, tassa palasit ajoqilluunniit upperisarsiornermik paasininneq tunngavigalugu suliaqannginnissamik kissaataat biskopi misissussamagu. Upperisarsiornermi immikkoortunik ataasiakkaanik nalilersuinissaq ilageeqarnermilu sullissisut pisussaaffiitut tunngatillugu misissuineq pissaaq, tassunga ilanngullugit innuttaasut inatsisit tunngavigalugit piumasqaataat malinniarlugit maannakkut pissutsini periarfissat

Aallaaviusoq tassaavoq palasit ajoqilluunniit tamanut tunngasumik aalajangersimasumilluunniit upperisarsiornermi pissuteqarlutik ilagiinni suliassanik aalajangersimasunik suliaqarniannngitsut, suliaqannginnissaannik akuerineqassasut. Imaassinnaavorli assersuutigalugu ajornartoortoqarnerani assersuutigalugu suaiaqatigiinnik avissimasunilluunniit katititsinermi palasit ajoqilluunniit pineqartut atorlugit ilaagiinni ilaasortanut tunngatillugu inatsisit tunngavigalugit pisussaaffiit malinneqarnissaanut periarfissaqartoqanngitsoq. Palasip ajoqiluunniit ilagiit ilagiinnut pisussaaffeqarnerisa kinguneranik suliaqannginnissamik akuerineqannginnissani akuersaartariaqarppaa, naak inuttut upperisarsiornermik paasinninnermi isumanerluuteqaraluarluni.

Imm. 3-mut

Imm. 3 naapertorlugu pisuni ataasiakkaani palasip ajoqilluunniit iliuuserisassatut pisinnaanngisaat biskoppimut saqqummiunneqassaaq, taassumalu upperisarsiornermut tunngaveqarnersoq qinnuteqaallu aakuerneqarsinnaanersoq aalajangiiffigissavaa. Palasi ajoqilu provstimut saaffiginnittartuunerat eqqarsaatigalugu, suliaq provstimut

saqqummiutissavaat taassumalu biskoppimut ingerlateqqissallugu. Suliani taakkunani provsti taamaalilluni aalajangiinissamut piginnaatinneqanngilaq.

Illersuisarneq siornatigut ilaannakortumik ilagiit ileqquini tunngaviutinneqartaraluarpoq.

Palasi ajoqiluunniit upperisarsiornermut tunngaveqartumik oqaluffimmi suliassanik suliaqarsinnaanngippat, Kalaallit Nunaanni Ilagiit palasimik ajoqimilluunniit allamik oqaluffimmi suliassanik suliaqarsinnaasumik suliassanulluunniit peqataasinnaasumik nassaarnissamut pisussaaffeqassapput.

Nr. 6-imut

Aalajangersagaq aallaqqaammut tunngaviutitsinissamut aalajangersakkanik erseqqissaataavoq, tamannami aallaqqaammut atuagarsuarnik allattuisarnissamut Naalakkersuisut maleruagassanik erseqqinnerusunik aalajangersaanissaannut atuutsinniarneqarami, tamannali inatsisit oqaasertaanni nassuiaatinilu annikitsumik atuarneqarsinnaasuulluni. Palaseqarfiup ingerlanneqarnissaanut aalajangersakkat sinneri biskoppimit aalajangersarneqassapput, inatsisini atuuttuni allamik allaqqasoqanngippat.

Taamatuttaaq aalajangersakkami § 15, imm. 4-mi allannguinnissaq aalajangersaavigaa, biskoppi isumaqatigiissuteqarfigalugu atuagarsuarnik allattuisarnissaq pillugu Naalakkersuisut aalajangersakkanik erseqqinnerusunik aalajangersaasinnaatitaalerlutik, tamatumunngali pisussaaffeqartitsinani.

Nr. 7-imut.

Provsteqarfiup ilagiinnut sinniisaasa ataatsimiinnerini tamani provstip taasisinnaatitaanani peqataasinnaaneranut aalajangersagaq erseqqissaataavoq. Oqaatsip ”taasisinnaatitaanani” ilanngunnera § 16-imi tamarmi assigiittoqarnissaanik qulakkeerinninneruvoq, suleriaatsimullu atuuttumut sunniuteqassanani.

Nr. 8-mut.

Aalajangersakkami allannguutaasoq tassaavoq oqaaseq ”biskoppilu” ilanngunneqarmat. Taamaalilluni allattaaviup akuerineqartup assilineqarnera provstimut biskoppimullu paasissutissatut siunissami nassiunneqartassaaq. Biskoppi Ilageeqarnermut oqartussaasutut qullersaammat allattaaviup akuerineqartup assilineqarneranik nassinneqartariaqarpoq.

Nr. 9-mut

Aalajangersakkami § 20, imm. 1-ip allannguisoqarnera aalajangersaavigaa, taamaalilluni nakkutilliisarnissamut pisussaaffik ilagiit sinniisaanni ataasiakkaaniikkunnaarluni palasimut atuagarsuarnik allattuisartumiitinneqalissalluni. Aalajangersakkalli oqaaseqatigiit aappaanni aalajangersarneqarpoq, nakkutilliisarnissaq sumiiffimmi ilagiit sinniisaat suleqatigalugit ingerlanneqartassasoq.

Allannguummi ilagiit sinniisaasa piumassusertik malillugu sulinerat illersorniarneqarpoq. Nakkutilliisussaataanerup isikkua inunnut piumassusertik malillugu sulisunut taakkununga Kalaallit Nunaanni Ilagiinnut sullissisunut oqimaappallaartutut isumaqarfiginarmat. Inatsimmi § 15, imm. 3 malillugu palasip atuagarsuarnik allattuisuusup allaffissornikkut akisussaaneratigut nakkutilliisussaataanera pissusissamisoorpoq.

Ukiumoortumik provstimut nakkutilliineq pillugu nalunaarusiamik nassiussisoqartarnissaa aalajangersakkami nutaajuvortaaq. Tamatumani qulakkeerniarneqarpoq provstit biskoppilu illuutigineqartut qanoq innerinut ataatsimoortumik isiginnissammata, ilisimasarlu tamanna aallaavigalugu Naalakkersuisut suleqatigalugit tamatumani pingaarnersiuiinernik pisariaqartinneqartunik suliaqartassallutik.

Nr. 10-mut

Aalajangersakkami allannguutaavoq, § 21 malillugu siunnersuutit palasimut atuagarsuanik allattuisumut saqqummiunneqartalernissaat provstimut saqqummiunnagit. Palasip atuagarsuarnik allattuisup palaseqarfimmi oqaluffinnik taakkunungalugu toqusut inaat ilanngullugit tak. § 20, imm. 1, nakkutilliisussaataalernerata kinguneranik pissusissamisoornerusutut isigineqarpoq siunnersuutit palasimut atuagarsuanik allattuisumut tunniunneqartarnissaat provstimut tunniunnagit.

Nr. 11-mut

Kapitali 7-ip nutaap ilanngunneqarnerani ilagiinni atorfinitsitsisarnerit pillugit inatsisartut peqqussutaannik ilanngussineruvoq, taamaattorli aalajangersakkani arlalinni allannguuteqarlunilu nutaanik ilaartuisoqarpoq. Ilutigisaanik peqqussut atorunnaarsinneqarpoq, tak. § 2. Siunnersuummi § 1, nr. 11-mi aalajangersakkanut ataasiakkaanut oqaaseqaatit aaqqissuinikkut pissuteqartumik aalajangersakkap nutaamik paragrafilerneratut taaneqartassapput.

Kapitali 7-imi inatsimmi allanneqartut kiisalu aalajangersakkat ataasiakkaat iluarsineqartarsimapput kalaallisut taaguutit pisortatigoortut takkuttut eqqarsaatigalugit.

§ 26 a-mut

Aalajangersagaq Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-imeersumi § 1-imi ingerlatitseqqineruvoq.

Oqaaseqaatinut tunngatillugu siusinnerusukkut oqaaseqaatini naqqiutit eqqarsaatigalugit oqaaseqaatit iluarsineqarsimapput, tamakku piffissaq eqqarsaatigalugu aalajangersakkamut taamaallaat tunngammata. Tunngavilli ataaseq peerneqarsimavoq, tassami palasit atorfii immikkut ittut atorlugit *danskit* ilagiit ataatsit arlalilluunniit kisiisa sullinneqassaarsimmata. Kalaallit ilagiit ataatsit isigisariaqarput, innuttaasut akornanni oqaatsit tungaasigut atorumanerusat imaluunniit taakkununga piginnaasat apeqqutaatinngit.

Aalajangersakkami piunasaqaatit Kalaallit Nunaanni Ilagiinni palasitut atorfinitsitsinissamut piunasarineqartut taaneqarput, tassunga pingaarnermik ilinniarsimanermut piunasaqaatit ilaallutik. Tamatumaniissaaq provstitut atorfinitsitsineq atuuppoq, tak. §§ 26 j, 26 k aamma 26 l.

Imm. 1, nr. 1-3-mi taaneqarput palasinut *atorfinitsitsinermi* piunasaqaatit. Tassani assinganik qinnuteqarluni toqqarneqartup § 26 d-mi *sulilernissamut* piunasaqaatit aamma naammassisimassavai Kalaallit Nunaanni Ilagiinni palasitut suliffimmik suliffeqarsinnaassaguni.

Ileqqoq malillugu biskoppip ilagiillu sinnisaasa toqqaanermut peqataanissaat siunertaralugu atorfinitsitsinissamut oqartussaasut aallarniutaasumik suliamik suliarinninnerannut biskoppimullu nassiussineranut atatillugu qinnuteqaatip tigungnerani atorfinitsitsinermi piunasaqaatit misissorneqartariaqarput. Qinnuteqartut atorfinitsitsinissamut piunasaqaatinik naammassinnissimasut kisimik biskoppimut naliliiffigisassanngorlugit ingerlateqqinneqassapput.

Imm. 1, nr. 1-imut

Imm. 1-imi erserpoq atorfinissinnaaneq eqqarsaatigalugu Ilisimatusarfimmi bacheloritut naammassisaqarsimaneq danskit universitetianni kandidatitut naammassisaqarsimanermut sanilliunneqarsinnaasoq. Tassunga pissutaavoq palasinik amigaateqartoqarnera, Ilisimatusarfimmiillu bacheloritut naammassisaqarsimasut kalaallit kulturianut kalaallilu oqaasiinut ilisimasaqarnerummata. Taamatuttaaq pastoralseminariumimi ilinniartinneqarsimanissaq piunasaqaataavoq.

Imm. 1, nr. 2-mut

Maannakkorpiaq ingerlaqqiffiusumik kristumiussutsimut ilisimatusarnermut ilinniarnernut malittarisassanik aalajangersakkanik peqartoqanngilaq. Aalajangersagarli pigiinnarneqarpoq. Tassunga pissutaavoq kissaatiginnittoqarnera inuit taamaattumik ilinniagaqarsimasut palasitulli atorfirmut suli qinnuteqarsimanngitsut qinnuteqarnissaminnut periarfissaqarniassammata. Pissutaasoq alla tassaavoq ilinniarnerni nutaani ilinniarsimasut, soorlu assersuutigalugu kalaallit ilinniartitsisunngorniartut ukiunik arlalinnik universitetimi ilinniarnertik ilallugu, periarfissaqarnissaat kissaatigineqarmat. Ilinniartitaanernut taamaattunut malittarisassanik sukumiinerusunik Naalakkersuisut aalajangersaassapput.

Imm. 1, nr. 3-mut

Danskit ilagiivini palasinngornissamut piunasaqaatit Lov nr. 310 af 16. maj 1990 om ansættelser i folkekirken mv.-imi kingusinnerusukkut allannguuteqartumi takuneqarsinnaapput.

Imm. 2-mut

Imm. 2-mi aalajangersagaq nutaajuvoq, periaatsimilli atorneqareersumik aaqqissuussinertut isigisariaqarluni. Danskil ilagiivinut ilaasortaanermut innersuussinermi pineqarpoq naalagaaffimmi ilagiit pisanerq malillugu paasineqarnissaat, tak. aamma inatsimmi § 2 tassungalu oqaaseqaatit. Tassani paaseqquneqarpoq naalagaaffeqatigiinnerup iluani ilagiinnut ilaasortaq imaluunniit upperisarsiortunit naaggaartuusuneersoq nunanit allaneersoq ingerlaannartumik ilagiinnut ilannguttassammat nunani naalagaaffeqatigiinnerup iluani najugaqalerfimmini.

Imm. 3-mut

Malittarisassani Naalakkersuisunit suliarineqartussani anguniarneqarpoq palasit kalaallisut oqaasillit sapinngisamik amerlanerpaat pigineqalernissaat peqataanillu ataatsimut isigalugu palasinik amigaateqartoqarnera eqqarsaatigeqqullugu.

Imm. 4-mut

Aalajangersakkami tunngavigineqarpoq palasit Kalaallit Nunaanni Ilagiinni palasit sulinissaanni tunngaviusut nukittorsarnissaat.

§ 26 b-mut

Aalajangersagaq pingaarnertigut Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-imeersumi § 2-mik ingerlatitseqqiineruvoq. Taamaattorli aalajangersakkami erseqqissarneqarpoq, Naalakkersuisut qinnuteqartumut § 26 a, imm. 1, nr. 1-miit 3-mut piumasaqaatinik naammassinnissimannngitsumut palasit atorfimmut atorfinitsitsinissamut akuersissuteqarsinnaalersillugit. Erseqqissaanermut pissutaavoq kikkulluunniit qanoq ilinniagaqarsimaneq apeqqutaatinnagu atorfimmut qinnuteqarnissamik pisinnaatitaammata. Tassani Naalakkersuisut akuersissuteqarsinnaaneranni pineqarpiartoq tassaavoq palasit atorfimmut atorfinitsitsinissaq.

Aalajangersakkami tunngavilerneqarpoq § 26 a, imm. 1, nr. 1-miit 3-mut atorfinitsitsinissamut piumasaqaatini immikkut akuersisoqarnissaanik, kisiannili immikkut ittumik aatsaat pisoqarsimatillugu tunniunneqarsinnaalluni.

Taamaattorli § 26 b-mi immikkut akuersissuteqarsinnaanermut aalajangersagaq § 26 a-mi atorfinitsitsinissamut piumasaqaatit imaluunniit § 26 d-mi sulilernissamut piumasaqaatit atorlugit atuutsitsinnnginnissamut atorneqarsinnaanngilaq, tak. kinguliiniittut erseqqinnerusut.

Aalajangersagaq assersuutigalugu atorneqarsinnaassaaq pineqartoq piginnaasanik palasit atorfimmik isumaginninnissami pingaaruteqarluartunik malunnartumik pigisaqarpat. Biskoppi atorfinittussamut tunngatillugu suliap piviusorsiortuuneralu nalilersorluarnissaanut periarfissaqassaaq. Biskoppip ilagiinni sulinissaq sulisullu tungaasigut pissutsit pingaarnertigut akisussaaffigai.

§ 26 c-mut

Aalajangersagaq pingaarnertigut Ilagiinni atorfinitsitsisarnerit pillugit Inatsisartut peqqussutaanni nr. 8-mi, 30. oktober 1998-imeersumi § 3-mik ingerlatitseqqiineruvoq, una allannguutigalugu § 26 a, imm. 1, nr. 1-mi aamma 2-mi ilinniarsimanermut piumasaqaatinut allaanerusumik aalajangersaasoqassatillugu biskoppip innersuussinera aallaavigineqassammat.

Aalajangersakkap palasitut atorfinitsitsiniarnermi ilinniarnermut piumasaqaataasunit immikkut akuersissuteqarsinnaanermut Naalakkersuisut nalinginnaasumik periarfissippai. Tamanna isumaqarpoq inuit kikkugaluartulluunniit ilinniarnermik aalajangersimasumik allamik naammassinnissimasut palasitut atorfininnissamut Naalakkersuisunit akuerineqarsinnaassasut.

Immikkut akuersissuteqartoqarsinnaaneq aatsaat pisinnaassaaq § 26 a, imm. 1, nr. 1 aamma 2-mi taaneqartut malillugit inunnik ilinniarnermut piumasaqaataasunik naammassinnissimasunik amigaateqartoqarpat.

§ 26 d-mut

Aalajangersakkami erseqqissarneqarpoq atorfininnissamut piumasaqaatit pineqartut, Ilagiinni atorfinitsitsisarneq pillugu Inatsisartut peqqussutaanni nr. 8, 30. oktober 1998-imeersumi § 4-mik ingerlatitseqqiineq. Kinaluunniit Kalaallit Ilagiinni atorfinitsinneqartoq atorfininnissamut piumasaqaatit Biskopimit soraarummersinneqarsimassapput, tamassumunnga ritualit atuuttut naapertorlugit palasinngortinneqarsimassalluni, palasit neriorsuutaat atsiorsimassallugu kiisalu biskoppip atorfinitsitsinermi allagaa tigusimassallugu.

Atorfinitsitsinissamut oqartussaaffiup suliassaraa atorfimmu pineqartumut qinnuteqartup/piukkunneqartup toqqaasup piumasaqaatinik naammassinnissimanersoq misissussallugu.

Biskoppip uppersaasigaanik palasitut sulisinnaanngortitaasimaneq, ivertitsineq palasitullu neriorsuineq ataasiaannartumik pissaaq, biskoppimilli kollatsi atorfinitsitsinerit tamaasa piumasarineqartussaalluni. Kollatsi aqutugalugu ilagiinni atorfik biskoppip atorfini aqutugalugu sulilersussamut tunniutissavaa. Kollatsi naalagiarluni ivertitsinermi atuarneqassaaq.

§ 26 e-mut

Aalajangersagaq Ilagiinni atorfinitsitsisarnerit pillugit Inatsisartut peqqussutaanni nr. 8-mi, 30. oktober 1998-imeersumi § 6-imik ingerlatitseqqiineruvoq, imm. 1-imilu oqaatsitigut allanngortinneqarpoq ilagiit sinnisaasa palasimik atorfinitsitsisoqarnerani *inassuteqarsinnaanerat oqaaseqaateqarsinnaanerannut* allanngortinneqarluni.

Allanngortitsineq pissuteqarpoq palasimik atorfinitsitsisoqartillugu biskoppip ilanngunneqartarnissaanut nutaamik aalajangersagaqalermat (§ 26 f, imm. 2). Palasinik

atorfinititsinermi periaaseq atorpeqartoq provstinik atorfinititsinermi periaaseq assigalugu atorpeqartalerpoq.

Imm. 1-imut

Biskoppip provstimut piginnaatitsisinaaneranut tunngavigineqarpoq Nunatsinni inoqarfiit imminnut ungasissuummata.

Oqaaseq ”sapinngisamik” toqqarneqarpoq ataatsimiinnissaq piffissap silallu tungaasigut allanillu pissuteqartumik pisinnaajunnaarsinneqarsinnaammat.

Oqariaaseq ”ilaasortat toqqarneqartut” atornerani ”ilaasortarineqartut” peerneqarpoq, tassani pineqarlutik palasit ajoqillu ataatsimiinnermi tassani peqataasut. Naak ilagiit sinniisaanni nalinginnaasumik ilaasortaagaluarlutik, tak. § 16.

Imm. 2-mut

Imm. 2 Naalakkersuisut piffissaliussat, periaatsit il.il. pillugit malittarisassanik aalajangersaasinnaanannerannik imaqarpoq.

§ 26 f-imut

Aalajangersakkap Ilagiinni atorfinititsisarnerit pillugit Inatsisartut peqqussutaat nr. 8, 30. oktober 1998-imeersumi § 7 taarserpaa.

Imm. 1-imut

Aalajangersakkami imm. 1 iluarsineqarpoq, tak. § 26 e, imm. 2, tassani ilagiit sinniisaasa inassuteqarsinnaanerat *oqaaseqaateqarsinnaanerannut* allanngortinneqarmat.

Ataatsimiinnermi qitiutinneqartoq ataatsimiinnerullu qaqugu pinissaa erseqqissarniarlugit, tassani ilagiit sinniisaasa oqaaseqaammik tunniussineranni, ”ataatsimoortumik ataatsimiinneq” ”oqaaseqaateqarfiusumik ataatsimiinneq”-mik taarserneqassaaq, taamatuttaaq kinguneratigut erseqqissarneqarluni oqaaseqaateqarfiulluni ataatsimiinneq sapinngisamik ilisimatitsiffiusumik ataatsimiinneq nangiinnarlugu ingerlaneqartariaqartoq.

Ilagiit sinniisaasa oqaaseqaateqarfiusumik ataatsimiillutik taasineranni ilagiit sinniisaanni ilaasorta qataaseq qinerneqartoq ataasiarluni taasisinnaavoq. Ilagiit sinniisaat toqqarneqartussat atorfimmut tulluanngitsutut isumaqarfigigunikkik taasinnitsoorsinnaapput.

Imm. 2-mut

Aalajangersagaq nutaajuvoq, biskoppillu palasinik atorfinititsinermut peqataasarnissaa aalajangersarneqarluni. Siullermik biskoppi ilagiit sinniisaannut ilisimatitsisussaataaneq aqputigalugu paasissutissiisussaagaluarluni aalajangersagaq manna aqputigalugu pingaaruteqartumik inissisimalerpoq, tassami biskoppi ilagiit sinniisaasa oqaaseqaataasa saniatigut sapinngisamik inassuteqartussaammat ikinnerpaamik qinnuteqartunik pingasunik

tulleriarlugit pingaarnersiukkanik inassuteqarnermigut. Biskoppi suliamut oqaaseqaateqarsimatinnagu qinnuteqartumik inassuteqarnermut ilaanngitsumik Naalackersuisut atorfinitsitsisinnaangillat.

Taamatut nutaamik piginnaatitsineq Ilagiit pillugit inatsimmi ingerlatsinikkut iluseq tunngavigalugu pilersinneqarpoq. Biskoppi Ilagiit qitiusumik aqunneqarnerannut qullersaalluni akisussaasutut palaseqarfinni ataasiakkaani palasitut kikkut inassuteqaataassanersut sunniuteqarfigisariaqarpai.

Biskoppi inassuteqarnermigut ilagiit sinniisaasa arlaat pillugu oqaaseqaataannut pituttorsimangilaq.

§ 26 g-mut

Atorfinitsitsinissamut oqartussaaffiup Naalackersuisuniinnera aalajangersakkami oqaatigineqarpoq.

Qinnuteqartumik biskoppip inassuteqarneranut ilaanngitsumik atorfinitsitsinissamik Naalackersuisut kissaateqassagalarpata biskoppi tusarniarneqaqqaassaaq. Tassani paaseqquneqarpoq Naalackersuisut biskoppimut qinnuteqartoq/piukkunneqartoq kissaatigineqartoq pillugu nassuiaallutillu kajumissaarissammata, paarlattuanillu biskoppi tamatumunnga Naalackersuisunut siunnersortitut kissaatigineqartumut tassunga oqaaseqarnissaminut periarfissaqassalluni Naalackersuisuni nutaamik nalileeqqinnissamut atugassamik.

§ 26 h-mut

Imm. 1-imut

Atorfinitsitsinermi oqartussaasut toqqaanerup nalaani oqartussaasunut peqataasunut pituttorsimapput. Tamatumani ilagiit sinniisaasa oqaaseqaataannut. Tassalu qinnuteqartoq ilagiit sinniisaasa oqaaseqaataannut ilanngunneqarsimanngitsoq toqqarneqarsinnaangilaq taamatullu atorfinitsinneqarsinnaanani. Tamatumani ileqqusoq malillugu ilagiit sinniisaasa peqataasut akornanni minnerpaamik pingaarnersiuiinermi siullertut, aappaattut imaluunniit pingajuattut inissinneqarsimasariaqarpoq.

Qinnuteqartup taasinermi siullermi tamanit taaneqartup, arlaqartut piumasarineqarpata ilagiit sinniisaanni peqataasuni taasisinnaasuni taaneqartup peqataanillu biskoppimit inassutigineqartup toqqarneqarnissaa oqaaseqatigiit aappaanni atorfinitsitsinermi oqartussaasut toqqaanermut atorfinitsitsinermullu ataqatigiissinneqarnerat oqaatiginiarneqarpoq.

Imm. 2-mut

Aalajangersagaq assersuutigalugu atorneqarsinnaassaaq qinnuteqartut piginnaasallit ikippallaartut qinnuteqarsimatillugit. Amerlanerpaatigut ilagiit sinniisaasa taasinerat

aallartitsinnagu oqaaseqaammillu tunniussitinnagit inuttassarsiuusseqqinnissaq isummerfigineqartussaassaaq. Kisiannili imaassinnaavoq taasisarnermi periuuserineqartoq malillugu qinnuteqartunik amerlanerik pissarsiniarnissamut periarfissanik misissuisitsisoqarnissaa pisariaqartoq. Inuttassarsiuinnermi qinnuteqartoq ataasiinnaasimappat (ilagiillu sinniisaasa amerlanerit taaseqataanginnerisigut) ataatsimiinnermi taaneqanngitsoorpat, tamatumani aamma atorfiup inuttassarsiuunneqaqqinnissaa kinguneratigut eqqarsaatigineqarsinnaavoq.

§ 26 i-mut

Aalajangersakkami malunnartumik allanngortoqanngilaq, taamaammallu Atorfinitsitsisarneq pillugu peqqussummit ingerlateqqitaapput.

Oqaaseqatigiinni siullerni siunertaavoq siunissami palasit atorfinnut immikkut ittunut atorfinitsitsinissami malittarisassanut aalajangersaanissamik Naalakkersuisut piginnaatinneqarnissaat. Atorfiit taamaattut napparsimmavinnut imalunniit pineqaatissinneqarsimasunut inissiisarfinnut attuumassuteqarsinnaapput. Aamma atorfiit avillugit isumagineqartussat eqqarsaatigineqarsinnaapput, palasi piffissap ilaani palasimut ikiortitit piffissallu ilaani assersuutigalugu Ilisimatusarfimmi imaluunniit ilagiinnut højskolemi ilinniartitsisutut sulisartussanik. Aamma atorfiit nutaat, assersuutigalugu soorlu biskoppeqarfimmi palasit atorfii, aalajangersakkamut matumunnga ilanngunneqarsinnaassapput.

Taakku saniatigut immikkut eqqarsaataavoq Palaseqarfik Danmark.

Aalajangersakkami oqaaseqatigiit aappaanni atorfinitsitsinerit suugaluartulluunniit ukioq ataaseq angullugu sivilisussuseqartut pineqarput, tassalu taartaallutik atorfinitsitat. Aalajangersakkami anguniarneqarpoq aappaanni ilagiit sinniisaasa peqataatinneqartarnissaannik kissaateqarnermut aappaannilu taartaasartut piffissaq sivikitsoq atorlugu sulisunngortinneqartarnissaannut oqimaaqatigiittoqarnissaanik kissaateqartoqarnera.

§ 26 j-imut

Aalajangersagaq nutaajuvoq, massakkulli periuuserineqartumut aaqqiissutaalluni.

Ilisimatitsiffiusumik ataatsimiinnerup aaqqissuunneqarnera palasimik atorfinitsitsisarnerup assigaa, tak. siunnersuummi § 26 e, imm. 1, tassanilu assigiinngissutaavoq provstitut atorfinitsitsineq pineqarmat taamaattumillu provsteqarfimmi ilagiit sinniisaat tamarmiullutik ataatsimiinnermi ilisimatitsiffiusumi peqataasarnissaat.

Imm. 1-imut

Biskoppip provstimut piginnaatitsinerani Nunatsinni sumi nunaqarnermi immikkut isikkoqarnera isiginiarneqassaaq. Biskoppimit qanorluunniit piginnaatitsisoqaraluarpat taannaavoq ataatsimiinnissap aallartinnissaanut suliniuteqartitaasussaatitaasoq.

”Sapinngisamik” oqarnermut pissutaavoq ataatsimiinneq ingerlanneqarsinnaajunnaarsinnaammat piffissaq, sila allallu pissutaallutik.

Imm. 2-mut

Imm. 2 piffissaliussat, periutsit il.il. pillugit malittarisassanut Naalakkersuisut aalajangersaanissaminnut piginnaatinneqarnerannik imaqarpoq.

§ 26 k-mut

Aalajangersakkap § 26 l-imut siunnersuummut ataqatigiissillugu Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-imeersumi § 10 taarserpaa.

Biskoppi inassuteqarnermini ilagiit sinniisaat kimut oqaaseqaateqarsimanerannut pituttorsimanngilaq.

§ 26 l-imut

Aalajangersakkami atorfinitsitsineranut oqartussaaffiup Naalakkersuisuniinnera oqaatigineqarpoq.

Qinnuteqartumik biskoppip inassuteqarneranut ilaanngitsumik Naalakkersuisut atorfinitsitserusussagaluarpata biskoppi tusarniarneqaqqaassaaq. Tassani erseqqissumik paaseqquneqarpoq Naalakkersuisut biskoppimut qinnuteqartoq/piukkunneqartoq kissaatigineqartoq pillugu nassuiaateqarlutillu kajumissaaruteqassammata, paarlattuanillu biskoppi suliaasaqarfimmut Naalakkersuisumut siunnersortitut kissaatigineqartumut oqaaseqarnissaminut periarfissaqartariaqarluni Naalakkersuisuni nutaamik nalilersorneqarnissaa siunertaralugu.

Qinnuteqartumut/piukkunneqartumut biskoppip inassuteqarneranut ilaanngitsumut tamannalu pillugu kingusinnerusukkut eqqartuinissamut biskoppip qaaqquneqarfiginngisaanut toqqaanissaq atorfinitsitsinissarlu pillugit aalajangiinerup piviusunngortinnissaa amigaateqarpoq.

Imm. 2-mut

Provsteqarfiup palaseqarfiit arlalinnut attuumassuteqarnera pissutigalugu inatsimmi ersarissarneqarpoq provsti palaseqarfimmi provsteqarfiup allaffiata inissisimaffiani najugaqarlunilu sulissasoq. Aalajangersakkami piumasarineqanngilaq qinnuteqartoq illoqarfimmi provsteqarfiup inissisimaffiani najugaqarnissaa, taamaattumillu palasit qinnuteqarfiup nalaani sumiluunniit najugaqaralarunik qinnuteqarsinnaallutik.

§ 26 m-imut

Aalajangersakkami Kalaallit Nunaanni Ilagiit ingerlatsivittut atorfinnut tamanut atorfinitsitsinissamut oqartussaasunnorgortinneqarput biskoppimut, provstimut palasinullu atorfinitsitsisarnerit kisiisa pinnagit, tak. § 6 siullertut aamma §§ 26 f aamma 26 i.

Taamaalilluni Kalaallit Nunaanni Ilagiinni sulisunut taaneqartunut atorfinitsitsinissamut biskoppi oqartussaavoq, kisiannili imm. 2-4 malillugu allatut pisoqartillugu oqartussaaffik biskoppip provstinut tunniussinnaavaa.

Aalajangersagaq aqutugalugu ilageeqarneq pillugu § 6-ip aamma immikkoortortat akornanni utertitsineq pillugu § 28-p akornanni tulluurtumik pisoqarpoq.

Imm. 3-mut

Oqaaseq palaseqarfiup kiffaa oqaatsimik pedelimik taarserneqarpoq, oqariaaseq taanna ulluinnarni atorneqarmat, aammali sulisut taakku atorfinitsinneqarnerannut isumaqatigiisummi takuneqarsinnaammat.

Kapitali 8-mut.

Kapitali nutaajuvoq, ilagiillu suleriaasiata nutarterneqarnissaanut innuttaasullu namminneq innuttaasunik nalinginaasumik sullinermut tunngatillugu saniatigut pisortanit sullinneqarnerminnut sullissinermut akiliuteqartarnissaannut kissaateqarnertut isigineqassalluni.

Innuttaasut namminneerlutik aterminnik allannortitsinissamik kissaateqarneranni uppersaatit pisortat ataasiarlutik akilereersimasaannik tunniussisoqartillugu atuisut akiliuteqartalernissaat kapitali aqutugalugu eqqunneqarpoq.

§ 26 n-imut

Aalajangersagaq nutaajuvoq, aternillu allannortitsinissanut siuliani oqartussaaffimmiittuni suliaqarnermi ilagiit akiliuteqartitsinissaanerat tunngavilerneqarluni.

Aternik allannortitsinerni atit siulliit, akulliit kingulliilluunniit allannortinneqarneri apeqqutaatinneqanngillat. Taamaalilluni assersuutigalugu ateq aqqilluunniit qinnuteqartup atiani peerneqassappata akiliuteqartitsinissamut tamanna ilanngunneqassaaq.

Qinnuteqartup aqqini arlalinnik allannortitsinissamut qinnuteqaat, assersuutigalugu atermik siullermik peersitsilluni peqataanillu nutaamik kinguliaquteqalerluni, atermik allannortitsinissamut nalunaaruteqarnertut ataatsitut suliarineqassaaq.

Aalajangersakkami piumasarineqarpoq aningaasat suliap aallartinnginnerani akilerneqartassasut, akiliutigineqartassaarlu qinnuteqaat akuerineqanngikkaluarpalluunniit imaluunniit akuerineqarpat.

Imm. 2-mut

Imm. 2-mi takuneqarsinnaavoq atermik allangortitsinerup akuersissutigineqarnerani akiliuteqarnermi uppersarsaatit marluk tunniunneqartassasut; atermik allangortitsinerup uppersarsaat immi tassungalu ilanngullugit inunngornermut/kuisinnermut uppersarsaat imaluunniit inunngornermut/atserneqarnermut uppersarsaat (apeqqutaalluni qinnuteqartoq qanoq atserneqarsimansoq). Akiliuteqarnerup iluani taamatut uppersarsaatinik marlunnik tunniussinermi takoqquneqarpoq ateq nutaaq siullermik atsiussinerup taarsiinerummat.

Imm. 3-mut

Imm. 3-mi takuneqarsinnaavoq akiliuteqarnissamut piumasaqarneq ataatsimut isigisariaqartoq. Taamaallit innuttaasut Kalaallit Nunaanni Ilagiit avaqqullugit atermik allangortitsisimasut kalaallilu inummut atsiussisarnernut inatsisaat naapertorlugu allangortitsinerup atuagarsuarnut ilanngussisinnasut, uppersarsaammik tunniussinermi akiliuteqartussaasut. Aammattaaq innuttaasut atuagarsuarni allasimasunit allaanerusumik atiminnik allangortitsivigineqarsimasutut misigisimagunik, tamannalu atuagarsuarnik allattuisutut oqartussaasut kukkunerannik pissuteqarsimanngippat, akiliuteqartoqartussaasaaq.

§ 26 o-mut

Aalajangersagaq nutaajuvoq aammalu litra a-mit e-mut uppersarsaatinik taaneqartunik tunniusseqqinnermut tunngaviliisuulluni. Uppersarsaat siulleq oqaluffimmi sulinerup atattillugu tunniunneqartoq imaluunniit inuit nalunaarsorsimaffiat aqutigalugu tunniunneqartoq taamaalliluni sulit aqartussaannilaq.

Aalajangersakkami piumasarineqarpoq uppersarsaatit tunniunneqannginnerani aningaasat akilerneqarnissaat.

Aalajangersakkami piumasarineqarpoq tunniusseqqittoqartillugu tamattigit akiliuteqartoqassasoq.

Uppersarsaatit erseqqissumik aalajangersakkami taaneqanngitsut akiliuteqaqqusinerup ilaangillat.

§ 26 p-mut

Aalajangersagaq nutaajuvoq, atuagarsuillu imarisaat aqutigalugu oqaasit marluit atorlugit (kalaallit/tuluttut) uppersarsaatinik tunniussisoqartillugu akiliuteqaqqusinnasat tunngavissinneqarluni. Taamaaliornikkut kiffartuussineq tamanna nammeneq piumasaqarnerup pisortanit kiffartuussinerannut nalinginnaasumut tunngatillugu saniatigit kiffartuussinertut isigineqarpoq, tamatumani siullermik tunniussisoqarnerani akilerneqareernissaa piumasarineqarluni.

Aalajangersagaq ataatsimut imatut paaseqquneqarpoq ilagiit uppersaatinik nunani tamalaani atornerqarsinnaasunik amerliartuinnartunik aperineqartalermeta ilagiit uppersaatinik kalaallisut/tuluttut allassimasunik piginnaatitsinikkut ingerlaavartumik tunniuttagaannik.

Uppersaat marluinnik oqaasertalik (kalaallisut/tuluttut) paasineqassaaq immersugassaaq oqaatsit marluk atorlugit suliareriigaq akuerineqartoq kingornatigut immersorneqartussaaq. Immersuiffissamik taassuminnga akuerineqartumik atuineq uppersaammik inatsisitigut atuinissamut uppersaataavoq, soorlu ilagiit uppersaataat allat taamaattut.

§ 26 q-mut

Inatsisartut inatsisaat manna naapertorlugu akiliutigineqartut nunatta karsianut nakkartineqassapput.

Nr. 12-imut

Aalajangersakkami oqaaseqatigiit aappaat ilanngunneqarpoq ilagiinni annerusumik nammineq aalajangiisinaanissaq erseqqinnerusumik inatsisitigut erseqqissarniarlugu.

Tunnigavigineqartoq inatsimmut atuuppoq, inatsimmilu § 6-imi oqaatigineqartunut ilaalluni, tassani ilagiit biskoppimit qitiusumik aqunneqarlutillu allaffissornikkut aqunneqarmata.

Aalajangersakkanut ataasiakkaanut nassuiaatini § 6-imi taaneqartut aamma erseqqissarneqarput, tassani ilagiinni ingerlatsiveqarnerat pineqarmat (ingerlatsivimmuut oqartussaaffik).

Oqaaseqatigiit nutaat aqutigalugit ilagiit namminneq aalajangiinerannut Naalakkersuisut kingusinnerusukkut misiliisinaanera inatsisitigut killilerneqarneranik kinguneqarpoq.

“Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik” inatsisilerinnermi periuseq pissutigalugu imatut allanngortinneqarpoq “Naalakkersuisut”, tamannalu pissutigalugu maalaaruteqarfiusartoq inaarutaasumik aalajangiisooq aalajangersassallugu pisariaqanngitsutut isigineqarlu, sulili piumasaaqataavoq naalakkersuisoqarfik Ilagiit pillugit suliasaqarfittut akisussaasoq aalajangiisuussasoq, aalajangiinerlu taana inaarutaasumik aalajangiinerusoq.

Tassalu ilagiit ingerlatsivittut oqartussaaffimmi iluanni aalajangiisimappata aalajangiineq tamanna oqartussaaffittut kingullertut, tak. § 28, imm. 3, Naalakkersuisunut tunniunneqarsinnaavoq, taamaalilluni aalajangiineq oqartussaaffittut ingerlatsiviup avataani oqartussaaffimmi aalajangiiffigineqarsinnaalluni.

Naalakkersuisut sulianik suliarinninnermini ilagiit sulianik suliarinninnermini aalajangiinnerminnilu ingerlatsinnermut malittarisassanik (inatsisitigut sinaakkusiussanik) malinnissimanagerat nakkutigissallugu piginnaasaqarpoq.

Oqaaseqatigiip nutaap atortinneqalerneratigut maalaaruteqarnissamut periarfissaq kingulleq tamanna killilerneqarluni ingerlatsivittut oqartussaaffinnit peerneqarluni Naalakkersuisunut ingerlanneqartalissaaq. Taamaalillutik apeqqutit imarisamikkut annermik upperisarsiornermut tunngassuteqartut tamakkiisumik Naalakkersuisuni maalaaruteqarnissamut oqartussaaffittut misilinneqarsinnaanngillat. Taamaattoq Naalakkersuisut maalaaruteqartarfittut Ilagiit naliliinerat inatsisitigut sinaakkusiussat iluanni pisimansoq nalilersorsinnaavaa.

Annermik upperisarsiornermut tunngassuteqartut pingaarnertigut ilinniartitsinermut attuumassuteqartut isigineqarput. Aalajangiinerit ilagiit ilinniartitsineranni tunngaviinut paasinninnissamut tunngassuteqartut, tassunga ilaalluni ritualit akuerisat piviusunngortinneri aqqutigalugit, taamaalillutik aallaavimmikkut naggataatigt ilagiit ingerlatsivittut oqartussaaffiisa iluanni suliarineqartussaassapput.

Suliattaq allat ilinniartitsinerup tunngaviannut attuumassuteqanngitsut pisut tunngavigalugit annermik upperisarsiornerup tungaatigut oqaasertaliinermut tunngatinneqarsinnaassapput.

§ 2-mut.

Siunnersuutigineqarpoq allannguutissatut siunnersuut 1. januar 2014 atuutilissasoq.